

## **MARG Ro Muawie Yaophi**

*Marg chaig pha jigigam hì ne Hamangkhung-aphuui pha Dufuui Isu pha Muawie ji zey ne um ro.* Isu ne riichai um ne bliathek rek pha rone zey pha jigigam ro. Ai riichai jine ai miyaogamthek yua pha jithek è thieg ruii phrone zey ne um ro. Ai blu è ibuii khia pha jithek ro, chiih-è layogthek khung phi pha è thieg dun rone zey ro. Isu è yao, Ai ne Hamangkhung-aphuui ro Dufuui ro, chiih-è ai ne branthek ro layog ruang rek phi pha wuii ro. Jithek yao pha jigigam zey ne um ro.

*Marg* ne Isu è bliathek rek pha ji zey dang ne ruii phi. Jon khowo phi pha ji sieng ne Hamangkhung-aphuui pha Mua ji yao ne khowo phi ne rai pha jigigam chiih-è Isu shii ibuii è chuajan noh pha miyao ji lujia zey srane sia ne blia rek pha jigigamthek zey ne um ro. Inai bajo re pha idoh è ai samoythek ne bajo wie gua dun. Jishii, aishii mak rek pho ne bajo lijieg dun pha jigigam zey ne um ro. Idoh pha jigigam ne Isu è sohnyiak shii diigchiao rek ne sieng marui pha jigigam ji zey ne um ro.

Jipha diigchiao ne Isu è bai shii zun ne iy dun pha ji zey ne um ro. Chiih-è, ai ne chai hòì din pha ji de zey ne um ro *Marg*

### **Iiing shii um pha ji**

Muawie jao pha (1:1-13)

Isu ne Galili hà hong ne blia rek (1:14—9:50)

Galili re-è Jerusalem (10:1-52)  
 Idohhè pha habda nane Jerusalem moe shii  
 (11:1—15:47)  
 Isu hòì òìn (16:1-8)  
 Khia pha nane Hamangkhung hà dun pha hòì  
 òìn (16:9-20)

*Howo phi pha Jon è yua*  
*(Mth 3:1-12; Lug 3:1-18; Jon 1:19-28)*

<sup>1</sup> Hì pha Mua Wie ne Hamangkhung-aphuui pha  
 Dufuui Isu Masi Chiang ro.\* <sup>2</sup> Hì ne Aijaya chaig è  
 zey pha jì duiine jao ne re ramuui ro:

“Hamangkhung-aphuui è yao, naro lumuui hong yi  
 pha,

‘gune guro muapho na è ibi thoh ruii phro.’

<sup>3</sup> Bijiujia ne balimuang hà ziaik ne rai ro,  
 Ithong wuii pha lumuui ne khriig rab ne rai  
 iang bo,  
 ai lua pha lumuui ne miang rab iang bo!”

<sup>4</sup> Chiih-è Jon ne balimuang hà khia, howo phi  
 ne yua. †Ai è branthek shii yao, “Nawaithek  
 layogthek re-è idoh khid srane howo yi mage  
 bo,” “chiih-è Hamangkhung-aphuui è nathek ro  
 layog shii khung phi ruii phro.” <sup>5</sup> Judea pho thek  
 chiih-è zab Jerusalem pha rajan pho thek de Jon  
 shii riig pha chiih-è ai miyao yoi pha wuii thog.  
 Hanyie è layog arek sha pha rone yao pho shii ai  
 è Jordan kho shii howo phi.

<sup>6</sup> Jon ne ùd pha iman è rab pha yungthek gui,

---

\* **1:1** 1:1: Giak jigi shii oi ro Hamangkhung-aphuui pha the Dufuui.  
**1:2** 1:2: Mal 3:1    **1:3** 1:3: Aij 40:3 (LXX)    † **1:4** 1:4: Jon ne  
 balimuang shii khia, howo phi ne yua; giak jigi shii um Jon howo  
 ne balimuang shii khia ne yua.    **1:6** 1:6: 2Saj 1:8

ai rinyie shii ne shukhug pha rathang ring ro. Ai ne muroma chiih-è jabiing chumud chie ne rai ro. <sup>7</sup> Jon è brantheek shii yao, gu è de bajo boh rek pha gai jia wuiiramuii ro. Ai ne bajoboh ro, gu ne airo khiao duiine bam ne ai lakhia ithang de athan mua phi ruii phro. <sup>8</sup> Gu ne nathek shii kho è khowo phi bie, jishii, ai ne nathek shii Hamangkhung-aphuii ro Ragung So è khowo phi ruii phro.

*Khowo nane Isu shii chuajan*

*(Mth 3:13—4:11; Lug 3:21-22; 4:1-13)*

<sup>9</sup> Achia dang pha idoh shii, Isu ne Nazareth beng pha ithua è Galili thiig hà wuii thog srane Jordan kho shii Jon wad re-è khowo yi. <sup>10</sup> Isu è khowo yi srane fuang khia mage shii, hamangkhung ne hong pha doh, chiih-è, Ragung ne fuii pharo duiine thazam aishii khey thog. <sup>11</sup> Chiih-è hamangkhung è goh jia yao ruii, “Na ne guro bushun pha Dufuii ro, na shii gu ne bajo miie ro.”

<sup>12</sup> Jipha Hamangkhung-aphuii pha Ragung è Isu shii balimuang hà noh dun. <sup>13</sup> Thiisa hà aishii ne, Sakhathong è inai sawi chuajan ne rai dun ro. Ai ne balimuang pha miiramtheek rog shii rai ne de, jishii hamangkhlhie è aishii nong phi ro.

*Û uapho wi shii Isu è ho*

*(Mth 4:12-22; Lug 4:14-15; 5:1-11)*

<sup>14</sup> Jon zum ne phatheg chab pha iidohhè, Isu ne Galili thiig hà dun thog din ro, thiisa hà ai ne Hamangkhung-aphuii pha Mua Wie ji yao ne rai:

---

**1:11** 1:11: Igo 22:2; Chng 2:7; Aij 42:1; Mth 3:17; 12:18; Mrg 9:7; Lug 3:22

15 “Hamangkhung-aphuui pha Sajathua ishak ji thog sha ruii ro, ji-è, nathek ne layog arek sha pha thadoh khid ne Mua Wie hì shii migi rek mage bo.”

16 Ji è yao srane Isu è Galili beng pha khabang iring hà wuii thog mage shii, Isu è ù ua pha nyi shii doh. Simon chiih-è ikhuui Andrew ne chiug mua ne rai pha doh ro. 17 Isu è isa shii yao, “Thawuii ne gu rog shii luagieng bo, chiih-è nasa shii sudoh è thiwing branthek shii zum pha yua phi pha ro.” 18 Khthiie ithek ne awaithek ro chiug thoh srane ai rog shii luagieng.

19 Ìujia thithe hà lua mage shii Isu è Zebedi pha dufuii Jems chiih-è Jon ne awai sa run shii chiug mua pha saro ne rai iang pha doh ruii phro. 20 Isu è isa shii doh ne ho mage shii, isa de awai sa aphuii Zebedi shii run lakhung pha branthek rog shii thoh marui ne Isu rog shii luagieng dun.

*Bran jia rog shii ne ibuui ragung um  
(Lug 4:31-37)*

21 Isu nane samoythek ne Khaphernaum beng pha thawun hà wuii dun. Chiihphado thimiang Jewthek Thung pha Inai shii, Isu ne Misiahò hà wuii srane ithek shii yua. 22 Ithek ne Isu muyua ji nuii ne zab wiengphleg dun, nyieliieshii, Isu ne Iphey yua pha masdo duiine asi pha riichai um ne yua dun ro.

23 Hamblo shii awie pha ragung è jiang pha jia è Hamangkhung-aphuui ro Misiahò shii wuii thog srane ziaak ne yao, 24 “Na ne gu rog shii nyie blia um lei? Nazareth pha Isu, na ne gu shii diig

phi pha wuii ne bey? Na ne hanyie lei? Ji gune thieg muii ro, nane Hamangkhung-aphuii pha So muapho ro.”

<sup>25</sup> Ji-è rek mage shii, Isu è giung ne yao, “Airo pha bucho è fuang khia mage bo!”

<sup>26</sup> Ji è yao mage shii, ibuii ragung ne sham ne khrif srane ziak ne ji pha bucho è fuang khia dun ro. <sup>27</sup> Wiengphleg pha blia rek mage ne ithek ne awaithek chung yao rai, Hì pha muyua ne nyie lei? Hì ne miyao iwo yua ne bey? Aishii ne riichai um ara ro, ibuii ragungthek de ai miyao nuii dun ro.

<sup>28</sup> Isu è rek pha blia miyao jine ne rib jia shii Galili thiig hà yoi thog dun ro.

*Isu è bajothek shii gang phi  
(Mth 8:14-17; Lug 4:38-41)*

<sup>29</sup> Isu ne Jems chiih-è Jon, chiih-è gai samoythek rog shii Jewthek ro Jewthek misiahò thoh srane Simon chiih-è Andrew hò hà wuii thog dun.

<sup>30</sup> Thiisa hà Simon ro khiing ne hakhang zia ne rad muii. Isu è thiichiih shii thog dang mage shii ithek è aishii yao. <sup>31</sup> Isu ne ai moe shii wuii srane aishii wad è sasey è chaing srane riu yi. Ji è rek mage shii hakhang zia pha ji ne gang re dun ro. Chiihphado ai ne ithek shii chie niing pha rab ne phi.

<sup>32</sup> Jipha habjuang hasiang yem ched pha idoh shii ithek è radpho shii chiih-è ibuiithek ragung è jiang pho thek shii Isu moe hà noh ne wuii thog ruii. <sup>33</sup> Chiih-è, thiigpho de zab habin moe shii wuii thog ne riig. <sup>34</sup> Thiichiih shii Isu è ithek shii yoyo pha miiriie è rad pho thek shii gang

rek phi, chiih-è, ibuiithek ragung shii de zab khia phi. Isu è ibuiithek ragung thek shii aro yi ro, nyieliieshii ibuii ragungthek ne Isu ne hanyieliie shii thiegjong ro.

*Isu è Galili thiig hà miyao yua*

*(Lug 4:42-44)*

<sup>35</sup> Jipha thimiang pha hamiang riang shii Isu ne sieng srane liijiing ithua hà sia pha wuii dun ro. <sup>36</sup> Ji è wuii pha idoh shii, Simon chiih-è gaithek de aishii so pha wuii dun. Ithek è ai thog mage shii, <sup>37</sup> ithek è aishii yao, ithek ne na shii sow ramuii ro.

<sup>38</sup> Ji è yao magunde, Isu è ithek shii yao din, “Gethek ne zab pha gai thiigthek hà de wuii chid phro. Chiih-è gune è rek ne yua chid phro, nyieliie shii, gune ichiih shii hì è rek pha ji wuii ro.”

<sup>39</sup> Ji-è, Isu ne Galili pha ithua hà lua srane Jewthek ro Jewthek misiahò shii yua ne zab pha ibuiithek shii de khia phi.

*Bran jia shii gang phi*

*(Mth 8:1-4; Lug 5:12-16)*

<sup>40</sup> Awiedang pha hà è rad pha jia yi Isu moe shii wuii thog ne yao, na è wie‡ rek pha now arone, hì pha hà riie pha ji ne wie nyarek mua phi.

<sup>41</sup> Isu è bushun now§ ne awai wad è aishii khoh srane yao, “Gune wie rek phi pha yang muii ro.” Ji-è, Isu è yao, wie re mage bo, <sup>42</sup> Ji è yao mage shii ji pha hà ne wie redun. <sup>43</sup> Ji è rek pha idoh shii Isu è aishii gang è yao srane thoh ge: <sup>44</sup> Chiih-è hì pha

---

**1:39** 1:39: Mth 4:23; 9:35    ‡ **1:40** 1:40 Wie sia ne gang phi  
 § **1:41** 1:41: Bushun; Giak jigi shii ne um roLijieg.    **1:44** 1:44:  
 Lew 14:1-32

bliak rek phi pha ji ne hanyie shii de ayao rabo. Ji è rek pha Chiang ne chiih-è Moses è phi pha jigigam duiine khlem yi srane miiriie ji wie re pha Chiang è phabi moe shii wuii ne khlem jithek zid mage bo. Ji è rek arone, ithek è na miiriie ne wie redun rone nyathieg ruii phro.

<sup>45</sup> Isu è ji è yao magunde, ithek ji yao rone yao wuii. Ji è rek mage shii ithek ne Isu moe shii bajo wuii thog, ji-è, ai ne ithek ro thiig jishii awuii mua din pha re dun. Ji è re mage ne Isu ne liijiing um pha ithua hà ug ne rai dun ro. Ji hà ug ne rai magunde, ithek ne athodang pha ai moe shii wuii thog.

## 2

### *Isu è slemriie pha jia shii gang rek phi (Mth 9:1-8; Lug 5:17-26)*

<sup>1</sup> Isu ne inai lujia idoh, Khaphernaum beng pha thiig hà awai hò shii dun thog din ne ji pha muathek shii yoi dun. <sup>2</sup> Ji è yoi mage ne ithek bajo wuii thog mage ne hò iliing hà ithua oi sha chiih-è habin moe shii de dug pha biang de oi dang pha re dun. Ai è ithek shii Hamangkhung-aphuii miyao ji yua. <sup>3</sup> Bran wi è slemriie pha ji shii oh srane Isu moe hà nothog. <sup>4</sup> Bran bajo um pha ji è ithek wi ne Isu moe shii noh ne awuii mua ro. Ji-è, ithek ne Isu khrug lakhung pha hò mugoh ji hong srane aishii lawiao rog shii Isu ibi shii zun mage. <sup>5</sup> Bran wi ji è bajo migi rek pha doh mage ne Isu è slemriie ne rad pha ji shii yao, gu ani wo! Na layog ne gu è khungjong phi ro.

<sup>6</sup> Ji è yao magunde, Iphey yua pha masdothek è awaithek lubu hà ug ne now, <sup>7</sup> nyie khi-èrek ne ai ne hì è rek ne yao mua phlei? Hì ne makhakriing rek pha miyao ro, nyieliieshii, layog shii khung mua phi phane Hamangkhung-aphuui bie ro.

<sup>8</sup> Ithek è nyie now pha ji ne Isu ne ibi thieg dun ro. Ji-è, Isu è din ne ithek shii yao, nyie rek ne nathek ne ji è now phlei? <sup>9</sup> Slem riie pha ji shii hì è sai pha, naro layogthek ne khung jong phi ro è yao pha ji wie bey, asi pha jiie srane nawai lawio chiing ne lua mage bo è yao muui pha ji ne wie bey? <sup>10</sup> Bran Dufuui hìne sohnyiak shii layog khung phi pha riichai um ara rone izai doh yi ro, gu nathek shii khagi rek ruii phro. Ji-è ai è slem rad pha ji shii yao, <sup>11</sup> “Gu na shii yao, sieng srane nawai lawio ji chiing ne nawai hò hà dun mage bo.”

<sup>12</sup> Ithek è riig dang pha ji shii, ai ne sieng ne awai lawio chiing srane awai hò hà dun dun ro. Ji è rek mage shii, ithek ne rum ne Hamangkhung-aphuui shii yao, na shii laso ro! “Hì è rek pha blia ne gathek khuchung de adoh ba ro.”

*Isu è Lewi shii ho*  
(Mth 9:9-13; Lug 5:27-32)

<sup>13</sup> Isu è dinne Galili pha khabang iring shii wuii thog mage shii ibrogthek ne Isu moe shii wuii thog. Ji-è, thiichihih shii Isu è ithek shii yua pha jao din. <sup>14</sup> Ji è rek ched ne Isu lua ramuii shii, mijin than pha jia awai mijin than pha ophis shii dug ne rai pha doh, ji pha Lewi ne Alphayus pha dufuui ro. Isu è aishii ho, “Na de gu rog shii luagieng bo.”



Ji è yao mage ne ji pha bran è jiie srane Isu rog shii luagieng ro.

<sup>15</sup> Ji è rek ched pha idoh shii Isu è ji pha Lewi pha hò hà wuii\* srane michie chie ramuii shii gai mijin than pha layog pho thek de Isu nane ai samoythek rog shii wuii ne thiibliie shii dug srane michie chie gieng. <sup>16</sup> Iphey yua pha Pharisithek è Isu ne layog pho chiih-è mijin than pho rog shii michie chie pha doh mage ne ithek è Isu pha samoythek shii sai, nyie rek ne ai ne ji è rek pha thek rog shii michie chie gieng phlei?

<sup>17</sup> Isu è ithek miyao ji yoi ne chang, hanyie arad pho ne ma pho shii achid phro, jishii, hanyie thek yi radpho ne, mapho shii chiid ruii phro, Gune ilab pho shii ho pha awuii ro, jishii gune layogthek shii ho pha wuii phro.

*Minyie nyie pha Chiang è miyao sai*  
(Mth 9:14-17; Lug 5:33-39)

<sup>18</sup> Sai pha inai jia shii Jon khowo phi pha samoythek chiih-è Pharisithek ne minyie nyi ne rai habuii ne, ithek è Isu shii wuii srane sai, “Jon chiih-è Pharisithek pha samoythek ne minyie nyi habuii shii na samoythek ne nyie rek ne minyie anyie ga?”

<sup>19</sup> Isu è chang, nathek ne inow bey, phiyiy shii wuii pha biwenthek ne michie achie pha nyadun ge ne bey? Khuchung de ji arek phro! Phiyiy pha bufuii um shii ne ithek ne anyie chid. <sup>20</sup> Jishii, ji pha idoh thog ramuii ro, phiyiy pha bufuii ne

---

\* **2:15** 2:15: Lewi hò hà; chiih-è airo hà (jine Isu hò hà ro) hò.

ithek rog è ruang noh dun phro. Chiiphado ithek ne minyienyie ruii phro.

<sup>21</sup> Hanyie è de yung thileg iwo jine phadiig hèg shii miak ne aphiog phro. Nyieliieshii yung thileg iwo ji è ri srane phadiig hèg jine boh ji dun phro.

<sup>22</sup> Hanyie è de jariie hèg shii ne phuii nyiu giog ne achab phro, nyieliieshii phuii nyiu bow mage ne ji pha jariie ne chui srane phuii ne zab noi dun phro. Ji-è phuii nyiu ne jariie iwo shii chab chid.

*Jewthek Thung pha inai pha musai sai*  
(Mth 12:1-8; Lug 6:1-5)

<sup>23</sup> Jewish Thung pha Inai shii, Isu chiikh-è ai samoythek ne phiug raig è dong srane lua ramuii shii, ithek è phiug iwoi ji chiig mage. <sup>24</sup> Ji-è Pharisithek è Isu shii yao, “Riig mage, naro samoythek è Jew Thung pha Inai shii hì rek phane gethek ro Iphey shii gidieg rek ro!”

<sup>25</sup> Isu è ithek shii chang ne sai, “Nathek ne atham riig bey? Dawid Saja ai chi-iyiy mage shii nyie rek phlei? <sup>26</sup> Ai è Hamangkhung-aphuii pha hò hà wuii srane Hamangkhung-aphuii shii zid pha iweb ji chie maphi, ai ji è rek pha idoh ne Abiathar Phabi giu de um ro. Gathek ro Iphey ji riig arone, ji pha iweb ne phabithek è chie mua bie, jishii, Dawid Saja è chie srane awaithek shii de phi ne chie yi.”

<sup>27</sup> Isu è miyao jong srane, “Jewthek Thung pha Inai ne bran shii wie re yi pha Chiang è rab phi ro, Jewthek Thung pha Inai pha Chiang è bran arab

ro. <sup>28</sup> Ji-è, Bran Dufuii ne Jewthek Thung pha Inai ro Ithong de ro.”

### 3

*Wad slemriie ne rad pha jia*  
(Mth 12:9-14; Lug 6:6-11)

<sup>1</sup> Ji-è rek ched mage shii, Isu ne Jewthek misiahò hà idoh dun shii, thiisa hà wad shii slemriie pha jia um. <sup>2</sup> Thiisa hà giak thek è Isu shii ichiig they pha khan ne rai iang ro. Ji-è, ithek ne Isu moe shii wuii ne, Jewthek Thung pha Inai shii gang rek phi bey ne, ji riig pha khan ne rai. <sup>3</sup> Isu è wad shii slemriie pha jishii yao, “Gu moe shii wuii mage bo!” Ji è yao ched ne, Isu è ithek shii sai, <sup>4</sup> Jew Thung pha Inai gethek thiigpha Iphey è gethek shii nyie rek bo ne zey lei? Nong phi pha zey bey? Asi buii rek phi bo è zey bey? Chiuh-è brantheek ro chai shii ragia rek phi ne bey? Asi pha chai shii mua muui ne bey?

Ji è sai mage ne, ji pha brantheek ne nyie de ayao muluii pha re dun phro. <sup>5</sup> Isu è ithek ne lubu siie now ne rai pha thieg ne bajo zo dun, ji-è, ai ne lijieg srane ithek shii shan srane riig mage ne wad zi ne rad pha ji shii yao, “Na wad ne gu shii phia mage bo,” ai è wad phia mage shii, ji pha wad ne gang re dun. <sup>6</sup> Ji è re mage ne ji pha Pharisithek ne Jewthek misiahò ji thoh srane Herod ro brantheek rog shii dug srane Isu shii ua pha phak rai.

*Khabang iring hà ibrog um*

<sup>7</sup> Isu chiuh-è ai samoythek ne Galili pha khabang iring è luaramuii shii, ibrogthek de ithek rog shii luagieng. Jipha brantheek ne Galili, Judea,

<sup>8</sup> Jerusalem, Idumia thiig hà rai pho, Jordan ithua: bichiu hà rai pho, Thaire chiih-è Sidon pha rajan hà rai pho ro. Ithek zab è Isu moe shii wuii thog, nyieliieshii ithek è Isu è rek pha blia jithek yoi dun ro. <sup>9</sup> Isu ne thiichiih shii Ibrog ne bajo iphiing um pha ji è Isu ne awai samoythek shii run jia shii khriig sow ne ruii iang pha yung, nyieliieshii ji pha ibrogthek è Isu shii wuii srane ziig mage inow ne yung. <sup>10</sup> Isu è bajo branthek shii gang rek phi, jiè hanyie rad aishii khoh pha aishii reng ne ai moe shii wuii thog dun. <sup>11</sup> Chiih-è, khuchung magunde aishii, ibuii ragungthek è jiang pha è Isu shii doh ne, Isu ibi shii thud srane ziaak ne yao, nane Hamangkhung-aphuii pha Dufuii ro.

<sup>12</sup> Ji-è Isu è ibuii ragung shii giung, hì pha miyao ne hanyie shii de ayao dang rabo.

*Isu è samoy snanyi shii ho  
(Mth 10:1-4; Lug 6:12-16)*

<sup>13</sup> Ji è rek pha idoh shii, Isu ne phiing hà wuii srane ai è chiid pho thek shii awai moe hà ho, chiih-è ithek de ai moe shii wuii thog. <sup>14</sup> Thiichiih shii, Isu è snanyi shii awai guaphasamoy rek pha gua. Ithek shii Isu è samoy rone beng ne ruii. Isu è yao, “Gune nathek shii gu rog luagieng pha gua ro. Ji-è gune ithek shii de gu miyao ji yao pha gai hà de wuii yi pha ro. <sup>15</sup> Nathek shii ibuii ragungthek khia pha riichai um ruii phro.”

<sup>16</sup> Ai samoy snanyi ne Simon (Isu è aishii Phithar beng ne ruii phro); <sup>17</sup> Jems nane ai ikhuii Jon, Zebedi pha dufuii (Isu è isa shii Boanerges beng ne ruii, ji pha ibeng ne hakhliing pha bran

rone ibeng phi). <sup>18</sup> Andrew, Philip, Bortholomeu, Methiu. Thomas, Jems Alphayus pha dufuii, Thadaeu, Simon thiig shii dumuii rek pha ji ro, <sup>19</sup> Chiuh-è, Judas Iskharioth hanyie è Isu shii zum yi pha samoy ji ro.

*Isu nane Sakhathong*

*(Mth 12:22-32; Lug 11:14-23; 12:10)*

<sup>20</sup> Ji è rek pha idoh è, Isu ne dinne hò hà dun thog, dinne ji è rek pha ibrog boh è wuii thog mage ne Isu chiuh-è airo samoythek ne michie chie pha de ajo dang pha re dun ro. <sup>21</sup> Ai haliingpho è ji yoi mage ne Isu shii idoh noh pha wuii thog dun. Nyieliieshii, ithek è bajo yao ramuii, Ai ne biu dun ro.

<sup>22</sup> Jerusalem è wuii pha Iphey yua pha masdothek è yao, “Aishii ne sakhathong um ro, ji pha sakhathong ne ibuii boh ji ro, jiè ai ne ibuii shii fuang khia yi pha blu phi ro.”

<sup>23</sup> Ji-è Isu ithek shii ho srane ithek shii najang è shan ne yao phro: Khi è rek ne sakhathong è sakhathong shii khia mua mage phlei? <sup>24</sup> Soh chung gui rai ne che dun arone, ji pha thiig ne idang adung mua pha rai dun phro. <sup>25</sup> Haliing chung adung pha gui rai arone, ji pha haliing ne idang adung pha che dun phro. <sup>26</sup> Ji-è sakhathong pha sajathua pho chung de gui rai arone, ji pha sakhathong thek de adung rai phro, chiuh-è ji pha sajathua ne idang arai mua phro.

<sup>27</sup> “Hanyie de gang bran shii zum ne ajoi sapho shii ne, ji pha gang hò hà mogo agow mua phro.”

<sup>28</sup> Gu nathek shii izai yao phro, branthek pha zab layogthek, chiih-è khama pha Hamangkhung-aphuii shii buii yao pha thek ne nyakhung phi phro. \* <sup>29</sup> Jishii, hanyie è Ragung gang shii awie pha gidieg rek pho shii ne khuchung de akhung phi phro. Nyieliieshii, ai ne idang rai pha layog rek phro. <sup>30</sup> Isu ji yao pha ne, ithek è aishii ne ibuii ragung um rone yao phi ne ji miyao phi ro.

*Isu pha amuii chiih-è airo khuiinotek wuii thog phro*

*(Mth 12:46-50; Lug 8:19-21)*

<sup>31</sup> Ji è re pha idoh è, Isu pha amuii chiih-è ikhuiithek wuii thog ruii phro. Ithek ne sibiang hà riu srane Isu shii si pha rone mua thoh ge phro. <sup>32</sup> Isu moe shii dug pha ibrogthek è Isu shii yao, riig mage bo! Na amuii chiih-è na khuiinotek chiih-è na bumuiithek ne na shii si pha sibiang hà riu ne khan ramuii ro.

<sup>33</sup> Isu è ithek shii chang, “Hanyie ne gu amuii lei? Hanyie ne gu ikhuii lei?” <sup>34</sup> Isu è khama jia ai moe shii dug pho shii riig srane yao, “Riig mage bo, gu amuii ne hìthek ro, chiih-è gu khuiinotek hì ro. <sup>35</sup> Gu amuiithek, gu khuiinotek chiih-è gu bumuii ne hanyiethek è Hamangkhung-aphuii è nyie chiid pha ji rek pho ji ro.”

## 4

*Jiiepho pha najang*

*(Mth 13:1-9; Lug 8:4-8)*

---

\* **3:28** 3:28: awie manathek ithek è yao; din ne awie nathek ne Hamangkhung-aphuii shii buii yao pha de um ro. **3:29** 3:29: Lug 12:10

<sup>1</sup> Dinne Isu è Galili pha khabang iring hà rai srane yua ramuii shii, ai moe shii boh ibrogthek wuii thog ne shan ne ley mage ne ai ne run jia shii khrog ne in dun ro. Run jine kho è fuang hà um, chiih-è ithek ne kho iring shii riu yi. <sup>2</sup> Chiihphado ai è najang è shan ne miyaothek yua ne ithek shii yao:

<sup>3</sup> “Yoi mage bo! Luangjia shii bran jia è miiriie jiie pha wuii dun. <sup>4</sup> Ai è ji pha miiriie ne raig shii jiie mage shii, giak ne lumuii hà chiih dun. Jipha miiriie ne fuiithek è wuii srane zab chiing ne chie muii. <sup>5</sup> Giak miiriie ne lubao surong pha nyak shii chiih dun. Jipha miiriie ne khthiie sieng shii. Thiisa hà nyak ne jam asi pha ji è <sup>6</sup> hasiang siang mage shii, misieng ne zab goh ne iy dun; nyieliieshii, ji pha misieng ne iriing jam adab mua pha ji è iy dun ro. <sup>7</sup> Giak miiriie ne migem um pha jabiing hà chiih dun ro, ji pha miiriie ne siengthog mage shii, migem muiithek yang ne sieng dun pha ji è iwoi awoi mua pha re dun. <sup>8</sup> Chiih-è giak miiriie ne nyiak wie hà chiih ne, ji pha miiriie ne wie sieng ne, iwoi wie woithog ruii, giak ne phriie sa-uom woithog ruii, giak ne briie sariig woithog ruii phro, chiih-è, giak ne briie wiengjia woi thog ro.”

<sup>9</sup> Din ne Isu è yao, “Hanyie shii yoi pha khothek um arone, yoi mage bo!”

*Najang shan ne yao pha miyao siu ji sai  
(Mth 13:10-17; Lug 8:9-10)*

<sup>10</sup> Isu yi awai ji shii, ai miyao yoi pho thek chiih-è samoythek è aishii wuii srane najang shan

ne yao pha miyao siu ji sai, <sup>11</sup> Isu è ithek shii chang, “Nathek shii ne Hamangkhung-aphuii ro Sajathua pha miyao ug ne ruii pha ji phijong ro.” Jishii fuang hà riu pha yogai ne najang pha miyao siu ji nuii phro, <sup>12</sup> ji-è, Ithek ne riig phane riig shii, Thuh de adoh ro; ithek ne yoi phane yoi shii, thuh de agao ro. Chiih-è ithek ne ji rek arone, ithek ne Hamangkhung-aphuii shii khid phro, chiih-è, Hamangkhung-aphuii è ithek layogthek shii de khung phi ro.

*Isu è najang ji pha miyao siu yao  
(Mth 13:18-23; Lug 8:11-15)*

<sup>13</sup> Chiih-è Isu ithek shii sai, nathek hì pha najang shan ne yao pha miyao agao ba bey? Chiihphado, nyie khi-èrek ne gai pha najang è shan ne yao pha miyao ji ithek thieg mua yi phlei? <sup>14</sup> Jipha miiriie jiie pha ne Hamangkhung-aphuii pha mua ji jiie ro. <sup>15</sup> Giak ne lumuii shii chiih pha miiriie ne ji duiine ro, ithek ne jipha mua nuii ched dang shii ibuii è wuii srane jipha mua ne ithek è yie dun. <sup>16</sup> Giak bran ne lubao lakhung shii chiih pha miiriie duiine ro. Mua jine ithek bajo lised rek ne nuii gieng phro. <sup>17</sup> Jishii, ji pha mua ne ithek lubu iliing hà athog ba shii, mua phi pha chiang è, ithek shii diigchiaothek thog mage shii ithek ne jithek shii zab thoh din muii ro. <sup>18</sup> Giak brantek ne migem biing hà jiie pha miiriie duiine ro. Ithek ne ji pha mua ne nuii habuii shii, <sup>19</sup> Jishii awaithek



sieng pha Chiang è rum ne, bukho re yi pha miie ne, ichua ichua chiid pha ji thek è ji pha mua shii ne yang dun ne sennyia muii srane ji pha mua ne iwoi awoi mua pha iy dun ro. <sup>20</sup> Jishii, giak miiriie ne nyiak wie hà chiih pha duiine ro. Ithek ne mua ji nuii srane lubu hà ruii, chiih-è, iwoithek de wie woi ruii phro. Giak ne briie sa-uom woi ruii phro, giak ne briie so-riig woi ruii phro, chiih-è giak ne briie wieng jia thog pha woi ruii phro.

*Bai ichuang ne shiikhiiakhjam bucho hà  
(Lug 8:16-18)*

<sup>21</sup> Isu è dinne yao din, “Hanyie è ichuang yie srane shiikhiiakhjam chiih-è biang bucho hà ruii ne bey? Jine ithek è bunthruak lakhung hà aruii ne bey? <sup>22</sup> Nyie ug ne ruii pha ji ne fuang khia yi phro, nyie thieg ne ruii pha ji ne hong yi ruii. <sup>23</sup> Nathek shii khothek um arone yoi mage bo!”

<sup>24</sup> Isu è de ithek shii yao, “Nathek è nyie yoi pha ji shii isiie rek mage bo, nathek è ithek shii khi-èrek ne chua pha ji duiine, Hamangkhung-aphuii è de nathek shii ji duiine chua ruii phro, jishii, ai ne jiè de boh huak ne chua ruii phro. <sup>25</sup> Bran hanyie shii um iang phane, aishii dinne de bajo phi ruii phro, chiih-è, hanyie shii oi iang pha ji shii ne, aishii iujia um iang pha ji de yie dun phro.”

*Iriie sieng pha najang shan ne yao*

<sup>26</sup> Isu dinne yao, Hamangkhung-aphuii pha Sathua ne hì duiine ro, bran jia è awai raig shii

---

**4:21** 4:21: Mth 5:15; Lug 11:33      **4:22** 4:22: Mth 10:26; Lug 12:2

**4:24** 4:24: Mth 7:2; Lug 6:38      **4:25** 4:25: Mth 13:12; 25:29; Lug 19:26

iriie jiiie marui. <sup>27</sup> Ai ne habiu shii men dun, chiih-è inai shii ne lakhung sieng, chiih-è iriie jithek ne awailum ne sieng khlei ruii, jishii, ji pha iriie ne khi-èrek ne sieng ruii pha ji ne thuh de athieg mua ro. <sup>28</sup> Jine nyiak è rek ne sieng yi srane iwoithek de woi ruii phro; igobi ne iliung liung srane irab nyiu ne sieng bi ruii phro, chiih-è, imabuiithek bua ne iwoi woi ruii phro. <sup>29</sup> Iwoi jithek men pha ishak thog mage shii, ji pha bran è awairo barai rog shii riug pha jao, nyieliieshii yamiing pha ishak ne thog ro.

*Danaro pha iwoi è najang shan ne yao  
(Mth 13:31,32,34; Lug 13:18-19)*

<sup>30</sup> Isu è sai, “Hamangkhung-aphuii pha Sa-jathua ne imia rone gethek ne yao nyie rek ne yao phlei?” Isu è sai. Nathek shii nyie najang è yi ne yao pha lei? <sup>31</sup> Hì ne ji duiine ro, bran jia è sohjambling shii zab è ididuii thanaro iriie ji yi srane raig shii jiiie pha wuii dun. <sup>32</sup> Ji è jiiie marui pha idoh è ji pha misieng ne zab è de boh re ne sieng mage shii ji pha idiphak pha ilem shii fuiithek wuii ne irungthek rak ro.

<sup>33</sup> Isu è branthek shii awai bajo najang è hì duiine awai mua ji yua; ai ne ithek shii khama gao mua pha rek ne yao phi ro. <sup>34</sup> Ai ne khuchung magunde najang è ayao phane nyie de ayao dang ro, jishii ai ne awai samoy rog shii ji pha najang pha miyao siuthek ne wie rek ne yao phi ne gao yi ro.

*Isu è hasamkhanoi shii gak  
(Mth 8:23-27; Lug 8:22-25)*

<sup>35</sup> Jipha habjuang shii, Isu è awai samoythek shii yao, “Cho gethek ne khabang iring thrang hà wuii sha rai haro.” <sup>36</sup> Ji-è ithek ne run moe pha ibrogthek shii thoh marui ne Isu injong pha run shii khud ne in dun, jiè rek pha ji shii gai runthek de bajo um ro. <sup>37</sup> Humblo shii hasam boh sam mage, chiih-è khasao ne run lakhung shii jao thog. <sup>38</sup> Isu ne run pha idoh hà dun srane awai khrug shii tharo rone athan dang pha men dun. Samoythek è Isu shii chun ne ho, “Masdo, gathek iy sha pha rek muui pha ji ne na athieg bey?”

<sup>39</sup> Isu è jai srane ji pha hasam nane khasao shii yung, ji è giung dang shii ji pha hasam ne them dun. Thiichiih ne bajo liijiing rey dun. <sup>40</sup> Chiiphado, Isu è awai samoy shii yao, “Nathek ne nyie rek ne rum phlei? Thuh de nathek ne migi oi ba bey?”

<sup>41</sup> Jishii ithek ne Isu blia ji doh mage ne bajo rum dun chiih-è awaithek chung yao rai, “Hì ne hanyie lei? Hasam nane khajaothek de ai miyao nuii dun ro!”

## 5

*Isu è awie pha ragung um pha bran jia shii gang phi*

*(Mth 8:24-34; Lug 8:26-39)*

<sup>1</sup> Isu nane ai samoythek ne dinne Gerasa pha soh thug um pha Galili khabang iring pha ithua shii thog dun. <sup>2</sup> Thiichiih thog ne Isu run è fuang nya lung dang shii, thiichiih pha wieng muang hà rai pha bran jia si iang. Jipha bran shii ne awie ragung è jiang ne um. <sup>3</sup> Ai ne idang wieng muang hà rai, hanyie de aishii zum ne chiih-è ajoin mua

ro, <sup>4</sup> aishii shiirnai thang è lai wad joi magunde, shiirnai ne biethiak ne lai è dia srane dumrim rek muii. Ai ne bajo gang pha ji è hanyie de aishii azum mua ro. <sup>5</sup> Inai de, habiu de, ai ne wieng pha duchoi shii lua ne rai, chiih-è phiingthek hà shan ne lua srane ziak ne awai shii lubao è giao.

<sup>6</sup> Ai è Isu wuii ruii pha doh mage ne, Isu moe shii ran srane bam ne khung srane gang goh è yao, <sup>7</sup> “Zab è giu pha Hamangkhung-aphuii ro Dufuii, Isu! Na ne gu shii nyie blia um ga? Hamangkhung-aphuii Chiang è na gu shii diig aphi rabo!” <sup>8</sup> Ai è ji yao ruii pha ji ne nyieliieshii Isu è ji pha awie ragung shii fuang khia mage bo è yao.

<sup>9</sup> Ji-è, Isu de aishii sai, “Na beng nyie beng phlei!”

Jipha bran è Isu shii chang, “Gu beng ne ibrog ro, nyieliieshii, gu iliing shii awie ragung ne bajo um ro.” <sup>10</sup> Ji è chang srane ai è Isu shii khung ne yao, awie ragung shii ji pha thiig è ruang athoh ge rabo.

<sup>11</sup> Thiichiih inui pha phiing shii wak brogpho è wak ibrog jia ram ne rai iang pha doh. <sup>12</sup> Awie ragung è Isu shii khung srane yao, “Gathek shii ne ji pha wak ibrogthek bucho shii thoh mage bo.” <sup>13</sup> Ji è yao mage ne, Isu è jithek pha awie ragung shii ji pha wak ibrog shii thoh ge. Jipha itham nyi um pha wak ibrog ne khabang hà rei ne ran srane khabang hà biung ne zem dun ro.

<sup>14</sup> Wak brogpho è jithek re pha doh mage ne ran srane thiigpho chiih-è raigpho shii de zab yao mage, ji è yao mage ne ithek de nyie re dun pha ji riig pha thiichiih shii wuii thog. <sup>15</sup> Ithek è Isu moe

shii wuii thog mage shii bajo ibuii ibrog è jiang pha bran jine yung wie guii srane khani wie re ne Isu moe shii dug ne rai pha doh, jiè ithek ne ji riig srane rum dun. <sup>16</sup> Hanyie thek è ibuiithek jiang pha chiih-è wak ibrogthek shii nyie rek phi pha ji raigpho è ithek shii yao iang.

<sup>17</sup> Ji-è, thiichihih pha ithek è Isu shii wad khung srane ji pha ithua thoh ne dun bo ne yao.

<sup>18</sup> Isu è run iliing hà khud ramuii shii ibuiithek è jiang pha bran ji de Isu shii yao, “Gu shii de nathek rog shii dun gieng yi bo.” <sup>19</sup> Ji è yao magunde, Isu è aishii yao din, “Asi, nane idoh nawai hò hà dun srane nawai haliing pho shii Hamangkhung-aphuii è na shii khama bushun rek phi pha ji yao mage bo.”

<sup>20</sup> Ji è yao mage ne ji pha bran ne dun srane thiig sua shan ne lua srane Isu è nyie rek phi pha jithek shii zab yao phi. Ji yoi ne ithek de zab wieng dun.

*Jairus dimi nane hò-amuii shii Isu è gang phi  
(Mth 9:18-26; Lug 8:40-56)*

<sup>21</sup> Isu è khabang khlei pha ithua hà wuii din mage shii, thiisa hà de bran bajo wuii thog.

<sup>22</sup> Jairus chiih-è thiigpho Jewthek ro Jewthek misiahò pha dumuiithek Isu moe shii wuii thog.

<sup>23</sup> Jairus è Isu shii doh mage ne khungdang ne yao, “Gu dimi duiine bajo rad muui ro, na ne wuii srane wad è aishii kho phi bo, chiihphado, ai ne gang dinne sieng ruii phro.”

<sup>24</sup> Ji è yao mage ne Isu è ji pha bran rog shii wuii dun. Gai thek de Isu rog shii bajo wuii gieng pha ji è Isu moe shii ne zab ley dun.

<sup>25</sup> Thiisa hà dam snanyi è grab rek ne rad pha bimi jia um iang, <sup>26</sup> Jipha bimi ne bajo maphothek shii wuii ne riig yi ne de, chiih-è bajo bang phi ne mathek rek ne de awie phi. Ai ne wie re khlei pha asi pha bajo muna rad khlei dun. <sup>27</sup> Isu è rek pha bliathek yoi mage ne bimi jine ibrog um pha Isu moe shii wuii thog. <sup>28</sup> Awai è awai shii yao, “Gu è ai yung shii kho mage arone, gu ne gang re ruii phro.”

<sup>29</sup> Bimi jiè Isu yung shii kho mage shii, ai grab rek pha ji ne them dun. Ji-è ai ne awaishii than ruii, ai rad ne diig rek pha ji ne them dun ro. <sup>30</sup> Isu è ai ro gang yi pha blu ne khia dun rone thieg, jiè Isu ne ithek shii shan ne riig srane sai, gu yung shii hanyie mukho mage lei?

<sup>31</sup> Ai samoythek è chang, “Nyama pha bran na moe shii ley dun pha ji ne nawai de thieg; jiè na ne nyie rek ne sai phlei?”

<sup>32</sup> Ji è yao magunde, Isu ne ithek shii athodang pha ai yung shii hanyie mukho ji sow ne riig dun.

<sup>33</sup> Bimi ji è aishii nyie rek phi pha ji now ne sham ne rum srane Isu lai luii shii wuii ne lagiung niing ne khung ne izai yao. <sup>34</sup> Isu è ji pha bimi shii yao, “Gu dimi, naro migi è naro rad pha ji ne gang jong ro, jiè nane sang ne dun bo. Na è diig ne rad pha ji de gang dun bo.”

<sup>35</sup> Isu è jithek pha miyao yao ramuii shii, Jairuis hò è muaphothek wuii thog srane Jairus shii yao, “Na dimi ne iy jong dun ro, nyie rek ne Masdo shii nyama diig phi phlei?”

<sup>36</sup> Isu è ithek nyie yao\* pha ji ayoi pha rek srane,

\* **5:36** 5:36: isiie arek ro; dinne nuihiia.

Jairus shii yao, “Na ne arum chid rabo, migi now mage bo.” <sup>37</sup> Ji è yao srane Isu è gaithek shii anoh pha, Phithar, Jems chiih-è ikhuii Jon shii noh srane thiisa hà wuii dun. <sup>38</sup> Ithek Jairus hò hà thog shii, Isu è yoi, ithek ne anomuluii pha ziak ne cho ramuii ro. <sup>39</sup> Isu-è iliing hà wuii srane ithek shii yao, “Nathek ne nyie rek ne anomuluii pha rey phlei? Chiih-è nathek nyie rek muii ne choh phlei? Ani ne a-iy ba ro, ai ne men bie ramuii ro.”

<sup>40</sup> Ji è yao mage ne ithek ne Isu shii siak, jiè Isu ne ithek shii fuang hà thoh maruii srane ani ji pha aphuii chiih-è amuii chiih-è awai samoy uom shii noh ne ani men pha ùgud bucho hà khud dun. <sup>41</sup> Ai è bimi shii awai wad è giak srane yao, “Thalitha, khoum” jine “Bimi duii rone ho pha ji ro, gu è na shii sieng mage bo è yao ramuii ro!”

<sup>42</sup> Bimi ji è siengfad srane lua mage, (ai yi dam snanyi rey sha pha bimi ro), ji è rek mage shii, thiichihi um pho thek ne ji riig ne wiengdun. <sup>43</sup> Jishii, Isu è ithek shii ji pha miyao ne hanyie shii de ayao rabo ne yao srane yung ne ji pha bimi shii chie pha phi ne chie yi pha yung phro.

## 6

### *Nazareth hà Isu shii snai pha jigigam (Mth 13:53-58; Lug 4:16-30)*

<sup>1</sup> Ji è rek marui ne Isu ne ji pha ithua thoh srane awai samoythek shii noh ne awai thiig pha hò hà dun marui. <sup>2</sup> Jewthek Thung pha Inai shii, ai è Hamangkhung-aphuii ro Jewthek misiahò hà wuii srane jao ne yua. Ai miyao nuii pho thek de bajo um, ithek ji pha miyao yoi mage ne, zab

wiengphleg dun. Ithek è awaithek chung sai rai, “Ai ne buangthek ne khi-è id ne yao dun phlei? Aishii ne khi-èrek pha khani zen ne ruii phlei?” “Ai ne hìthek wieng pha blia ne khi re-è mua phlei? <sup>3</sup> Hì pha bufuii ne Mery pha dufuii chihih-è Jems, Joseph, Judas chihih-è Simon thek pha khuiino, zao rab ne rai pha ji asi bey? Ai bumuii ne ichiuh shii rai pha ji asi bey?” Ji è yao srane thiichiih pho thek è aishii snai mua phro.

<sup>4</sup> Isu è ithek shii yao, “chaig pho shii ne awai hò, awai thiig, awai bran, awai haliing pho thek è wie anow phro, jishii gai thek ne aishii wie now ruii phro.”

<sup>5</sup> Ji-è ai ne thiichiih shii nyie bliathek de arek mua phi, wad riie ne rad pho shii kho ne gang phi bie marui. <sup>6</sup> Ai ne bajo buangthek arek mua, nyieliieshii, ithek è aishii migi arek phi ro.

*Isu è samoy snanyi shii ithek ro thiig hà thoh ge (Mth 10:5-15; Lug 9:1-6)*

Chiiphado Isu è thiichiih inui shii um pha thiigthek hà wuii srane ithek shii miyao ji yua ne rai phro. <sup>7</sup> Ai è awai samoy snanyi thek shii ho srane nyi nyi rek ne thiig jithek hà thoh ge phro. Ai è ithek shii ibuii ragung thek shii khia pha riichai phi srane thoh ge. <sup>8</sup> Chihih-è ithek shii yao, “Nathek rog shii thagin yi bie ne nyie de ayie chiid rabo, iweb, bang chab pha shukhug biia, chihih-è, michie pheg ne chie pha bang thek de ayie chiid pha lua bo. <sup>9</sup> Lakhia ne khia bo, jishii, lai ne guii pha phadiigthek ne ahan chid rabo.” <sup>10</sup> Ai è dinne ithek shii yao, “Hanyie è, ithek shii wie ho ne hò



hà rai yi arone, nathek ne ji pha thiig athoh sapho shii ne ji pha hò shii rai bo. <sup>11</sup> Chiih-è nathek ne khi pha thiig shii wuii thog shii, ji pha thiigpho è nathek miyao nuii ne ithek shii ho ne arai yi arone, ithek ne ji pha thiig thoh ne dun juang shii, nawai thek lakhia pha nyiakphlab thiichihih kham ne fen srane dun marui bo. Ji rek phane ithek shii diig thog yi pha phriie marui phro.”

<sup>12</sup> Ji è yung ched ne ai samoythek è thiigthek hà miyao ji yua ne ithek layog rek pha ji è thadoh dun yi pha wuii dun. <sup>13</sup> Ithek è ibuii ragung jiang pho thek shii khia phi, chiih-è, rad pho thek shii de thiiliie è shun srane gang phi phro.

*Khowo phi pha Jon iy dun*  
(Mth 4:1-12; Lug 9:7-9)

<sup>14</sup> Ji è rek ched mage shii Herod Saja \* è jithek rek pha zab yoi dun, nyieliieshii, Isu pha beng ne bajo boh re dun. Chiih-è giak è shii yao shii, “Ai ne khowo phi pha Jon ji idoh hòi ne dun thog din ara! Ji-è aishii ne buangthek rek pha blu de um ro.”

<sup>15</sup> Giak è yao, “Ai ne Elija ro.”

Giak ne, “Ai ne buyo pha chaig pho duiine ro.”

<sup>16</sup> Herod Saja è ji pha miyao nuii srane yao, “Ai ne khowo phi pha Jon ji bey! Ai khrug shii ne tham jong muii bidey ne, dinne ai ne hòi dinne bey!” <sup>17</sup> Herod awai è yung ne Jon shii zum ne, shiirnai rek ne phang ne phatheg iliing hà chab muii phro. Ji è rek phane Herodias muyung ne

---

**6:11** 6:11: Blk 13:51      **6:13** 6:13: Jms 5:14      **6:14** 6:14,15:  
Mth 16:14; Mrg 8:28; Lug 9:19      \* **6:14** 6:14: Saja Herod: Herod  
Anthiphas, Galili shii bohkhoh.      **6:17** 6:17,18: Lug 3:19,20

rek yi ro, ai ne ikhunii Philip pha yiy shii Herod awai yi din dun. <sup>18</sup> Jon è Herod Saja shii athodang pha yao ne rai, “Na ne nawai khuii pha yiy ji yi phane Iphey shii zen oi ro.”

<sup>19</sup> Ji è yao pha idoh è Herodia Sajamuii (Herod pha yiy) ne bajo lijieg srane Jon shii ua yang pha now, jishii, thaluii shii ne a-ua mua phi, nyieliieshii Herod Saja um niing ro. <sup>20</sup> Herod Saja ne Jon shii bajo rum, nyieliieshii, Herod Saja è Jon ne bajo wie chiih-è bajo gang bran rone thieg dun. Ji-è ai ne Jon shii wie gayiig ne ruii, ai ne Jon miyaothek è lubu shii liijiing oi magunde, ji pha miyaothek ne bajo wie now ne nuii ne rai dun.

<sup>21</sup> Ji è rek magunde, Herodia Sajamuii è inai jia shii zo mua ne, ji pha inai ne Herod Saja giak pha inai ro, Herod Saja è dumuii boh pho, shii è arming pha boh thek chiih-è Galili thiig pha wegthek shii ho ne michie phi ramuii shii, <sup>22</sup> Herodia† dimi è iliing hà wuii ne gasiu siu srane Herod Saja chiih-è ai biwenthek shii bajo lubo rek phi, ji-è, Herod Saja è awai dimi shii sai, “Na ne nyie chiid pha now lei? Chiih-è nane gu shii nyie lia magunde, gu ne nyaphi ruii phro.” <sup>23</sup> Ai è surua thok srane yao, “Na è nyie lia magunde, gu, na shii ji phi ruii phro, guro Sajathua ji khuyo lia na de nyaphi ruii phro.”

<sup>24</sup> Dimi ji è fuang hà wuii srane ai amuii Herodia shii sai, “Gu ne nyie lia chiid phlei?”

Ai amuii è yao, “Khowo phi pha Jon ro khrug lia mage bo.”

---

† **6:22** 6:22: Herodias ro dimi; giak jigi shii ne umHerodias ro dimi.

<sup>25</sup> Ji-è ai dimi ne khthiie iliing wuii din srane Herod Saja shii lia, “Gu ne na shii Jon khrug lia phro, Jon khowo phi pha khrug tham ne phandua shii giong ne thuh shii phi-dang mage bo.”

<sup>26</sup> Jipha miyao è Herod Saja ne bajo zo dun, jishii ai dimi shii agak mua, nyieliieshii, ai è biwenthek moe shii surua thak jong muui ro. <sup>27</sup> Ji-è ai ne Jon khrug tham pha awai sandrithek shii thoh ge phro. Ji è yung mage ne ji pha sandri thek ne phatheg duchoi hà wuii srane Jon ro khrug tham mey phro. <sup>28</sup> Chiih-è ji pha Jon khrug ne phandua lakhung shii giong srane awai dimi shii phi ro, ai dimi ji è choi srane ai amuii shii yi ne phi din phro. <sup>29</sup> Jon pha samoy pho è ji pha mua yoi mage ne wuii srane iy pha siu ji yi ne wieng mua phro.

*Isu è itham guii pha bran shii michie phi ne chie yi phro*

*(Mth 14:13-21; Lug 9:10-17; Jon 6:1-14)*

<sup>30</sup> Ji phado samoythek ne Isu shii dun thog srane ithek è nyie thek rek ne yua marui pha jithek yao phi. <sup>31</sup> Thiichiih shii de ithek è Isu chiih-è ai samoythek shii chie pha de uhug oi dang pha wuii ruii mage. Ji-è Isu ne awai samoythek shii yao, “Cho! Gethek ne liijiing pha ithua hà dun sharai haro, chiihphado gethek de ùjia ne thung pha mua ruii phro.” <sup>32</sup> Ji-è ithek ne liijiing um pha ithua hà thog yi pha run shii in ne wuii dun.

<sup>33</sup> Ji è rek magunde, Isu chiih-è samoythek ne ithek moe è yo pha rek muui rone ibi than dun, chiih-è, Isu ne hanyie ga ji thieg muui pha ji è, ithek ne gai thiig è dong ne lua pha lumuii è ran srane

Isu chiih-è ai samoythek wuii thog pha ibi hà rai iang phro. <sup>34</sup> Isu run è fuang lung mage shii, thiichiih shii bajo ibrog um iang mage ne ai lubu ne iy dang pha bushun now dun phro, nyieliieshii, ithek ne brogpho oi pha shiishai duiine um iang, jiè ai ne, ithek shii bajo miyao jao ne yua. <sup>35</sup> Ji è rek ne rai shii, bajo chia dun pha ji è habjuang re sha pha rek mage ne, ai samoythek è ai moe shii wuii srane yao, “Gethek ne bajo chia jong dun ro, ichiih shii ne thiigthek de inui oi pha ithua ro. <sup>36</sup> Ithek shii thoh sha mage bo, chiihphado, awaithek è thiigthek chiih-è raighò sow srane awai thek chie niing pha nya phev mua phro.”

<sup>37</sup> Isu è yao, “Nathek ne ithek shii chie pha phi mage bo.”

Ithek è Isu shii sai, “Gathek è bajarai hà wuii srane liiman simedthek‡ wieng nyi pha iweb phev ne phi ne chie yi pha yang bey?”

<sup>38</sup> Ji-è Isu ne ithek shii sai, “Nathek shii khama iweb um lei ne riig mage bo.” Samoythek è ithek shii sai nathek shii iweb khama um lei, ithek è yao gathek shii ne iweb guii chiih-è ù nyi um bie ro. Ji-è ithek è Isu shii yao, “Iweb guii chiih-è ù nyi um ro.”

<sup>39</sup> Ji è yao mage ne Isu è awai samoythek shii yung, “zab thek shii ibrog yo rek ne saing lakhung shii dug yi bo.” <sup>40</sup> Ji-è ithek ne ibrog yo rek srane dug iang yi, giak ibrog shii ne wieng jia, chiih-è giak ibrog shii ne saguii rek srane dug dun ro.

<sup>41</sup> Chiih-è, Isu è iweb guii chiih-è ù nyi ji yi srane

**6:34** 6:34: Ssb 27:17; 1Saj 22:17; 2Phal 18:16; Ezkh 34:5; Mth 9:36

‡ **6:37** 6:37: Hayang pha ised Hayang pha ismed jia ne idang pha blia rekpho ro riinang ro (riig bo Mth 20:2).

hamangkhung hà mau ne Hamangkhung-aphuii shii laso phi. Chiih-è, iweb ji chiing ne phed srane awai samoythek shii phi ne ithek shii thang yi. Chiih-è, ù shii de thang yi. <sup>42</sup> Ji-è ithek ne lumuii dang pha chie dun. <sup>43</sup> Chiihphado samoythek ne led pha iweb chiih-è ùthek sirid snanyi ley dang pha khrab gieng phro. <sup>44</sup> Thiichiih chie noh pho ne itham guii ro.

*Isu è kho lakhung shii lua  
(Mth 14:22-33; Jon 6:15-21)*

<sup>45</sup> Luangjia shii, Isu è thiichiih wuii pha ibrogthek dun ge yi shii, awai samoythek shii de run shii in ne Bethsaida pha khabang thrang hà wuii iang pha thoh ge. <sup>46</sup> Ithek shii wie dun bo ne yao ched shii Isu awai de phiing hà sia pha wuii dun. <sup>47</sup> Jipha habjuang re mage shii, run ne khabang pha duchoi hà thog ne um dun, Isu ne awai ji khabang thrang hà rai ramuii shii, <sup>48</sup> Isu è awai samoythek shii run iliing hà bajo diigchiao rek ramuii pha doh ruii, nyieliieshii, Hasamkhanoi khed ramuii pha ji è ithek run ne shao thiwie pha rek dun. Ji-è Isu ne hamiang riang shii kho lakhung è lua ne samoythek moe hà wuii ruii, <sup>49</sup> Isu ithek moe thog pha re ramuii shii Isu è kho lakhung shii lua mage ne ithek ne zab rum ne ziak ne yao, “Ai ne ibuii ro!” <sup>50</sup> Ithek è aishii doh mage ne zab rum dun phro.

Isu è ithek shii yao, “Arum chiid pha lubu boh now mage bo! Hì ne gu ro!” <sup>51</sup> Ji è yao srane awai de samoythek rog run shii in mage shii Hasam de awai lum ne them dun. Ji è rek mage ne samoythek ne zab wiengphleg ne wieng dun.

<sup>52</sup> Nyieliieshii ithek ne Isu è itham guii bran shii iweb chiih-è ù phi ne chie yi pha miyao siu ne agao mua pha diig ne rai dun.

*Isu è Genesareth hà bajo bran shii gang rek phi  
(Mth 15:1-9)*

<sup>53</sup> ItheK ne khabang ji hiia ne Genesareth beng pha soh shii wuii thog, thiichiih shii ithek è run ne phang ne ruii marui srane lung dun. <sup>54</sup> ItheK ne run è nyalung dang shii, ithek è Isu shii ibi thieg dun. <sup>55</sup> Ji è ithek ne thiig hà ran srane zab shii yao iang, chiih-è, khama rad pho um phane Isu khi shii um pha ji shii noh ne wuii thog srane biang shii thieng yi. <sup>56</sup> Isu è khama pha thiig raig chiih-è bajarai hà wuii thog nede, ithek è khama rad pho um pha chiih-è chongjai rek pha ithua shii noh srane ai yung shii ùjia magunde khoh yi pha ithek shii khung ne lia phro. Hanyie è ai yung khoh mua pho ne zab gang dun phro.

## 7

*Blangthek shii zen pha iphey yua  
(Mth 15:1-9)*

<sup>1</sup> Pharisithek chiih-è Iphey yua pha masdothek ne Jerusalem è wuii srane Isu moe shii khrab ne riu thog ruii. <sup>2</sup> ItheK è ai samoythek ne Iphey shii zen pha duiine arek pha, wad achun pha michie chie pha doh ruii.

<sup>3</sup> (Nyieliieshii, Pharisithek chiih-è Jewthek ne riingthek è zen pha Iphey ji rek ne rai. ItheK ne wad achun bi sapho ne michie achie. <sup>4</sup> Chiih-è,

bajaraï\* è yi pha nyie magunde asud sapho shii ne achie bi pha rai. Chiih-è, gai khama pha Iphey awaithek pha riingthek muyua marui jithek ne athoh dang pha rek ne rai, jithek pha Iphey ne gog, jarai, blow, skhong chiih-è biangthek† sud pha Iphey ji ro.)

<sup>5</sup> Ji-è Pharisithek chiih-è Iphey yua pha masdothek è Isu shii sai, “Na thek ne nyi rek ne boyo riingthek mizen marui pha Iphey ji anuii pha rek phlei? Iphey ji nuii ne wad chun ne chie pha asi pha wad zia è michie chie khlei ne bey?”

<sup>6</sup> Isu è ithek shii chang, Aijaya è chaig ne nathek shii lawasdai ro è zey pha ji izai chak ara ro! Ai è zeyjong pha ji duiine:

Hì pha brantheK è Hamangkhung-aphuii shii yao,  
 gathek ne miyaogamthek rog na shii ilab  
 rek,  
 jishii, ithek ro lubu ne gu è bajo ruang ro.

<sup>7</sup> ItheK è gu shii sia pha ji ne thaluii ro, nyieliieshii,  
 ithek è, jine,

Hamangkhung-aphuii pha Iphey shii yua pha  
 khalo shii, ithek ne bran  
 murab pha Iphey ji yi Hamangkhung-aphuii  
 murab rone yua ne rai ro!

<sup>8</sup> “Nathek ne Hamangkhung-aphuii pha muyungthek ne the hà ruii muii srane bran muyua pha jithek rek ne rai phro.”

---

\* **7:4** 7:4: Nyie magunde bajaraï è thog pha ji shi ne ithek è igobi asid sapho shii ne; Din ne nyie magunde ithek bajaraï è athog sbo shii ne ithek ne igobi awaithek shii sud bi. † **7:4** 7:4: Giak jigi shii ne oi ro Chiih-è biangthek ro. **7:6** 7:6,7: Aij 29:13

<sup>9</sup> Isu è athodang pha yao ramuii shii, “Nawai thek è Iphey shii nyieliieshii Hamangkhung-aphuii ro Iphey shii snai yi pha rek phro.” <sup>10</sup> Moses muyung pha Iphey ne, nawaithek pha aphuii chiuh-è amuii shii ilab rek bo, chiuh-è, hanyie è aphuii amuii shii awie pha yao arone, aishii ne ua muii bo. <sup>11</sup> Jishii, ithek ne, nawaithek pha aphuii-amuii shii anong phi pha ithek ne jine Hamangkhung-aphuii rone yao phro, <sup>12</sup> Ji-è thuh shii ne nathek è awaithek aphuii-amuii shii anong yi ara ro. <sup>13</sup> Hì duiine, ithek muyua hì dun thog pha hìne Hamangkhung-aphuii pha miyaogam shii snai yi phro. Ji asi bie pha ji duiine ithek è gai bliathek de bajo rek ne rai.

*Manathek è bran shii zia rab phro  
(Mth 15:10-20)*

<sup>14</sup> Din ne Isu è ibrogthek shii ho din srane yao, nathek de gu miyao nuii ne ìd mage bo. <sup>15</sup> Nyie magunde, fuang è bucho dun phane Iphey shii zea‡ azen ro. Zia rab phane bucho è fuang khia ruii pha ji è zea rab ruii phro. [ <sup>16</sup> Nathek shii nuii pha khoh um arone, nuii mage bo.]

<sup>17</sup> Isu ibrog jiè thoh srane hò hà dun thog shii, samoythek è aishii sai, najang yao pha ji gathek ne a-ìd mua ro, gathek shii yao riig bo, <sup>18</sup> “Natek ne athieg bey? Nathek ne gai è de bajo athieg dang pho ro! Isu è ithek shii yao, ichiuh shii ne bran bucho è zea re phro, fuang è zia are mua phro. <sup>19</sup> Nyieliieshii, jithek ne lubu hà adun pha

---

**7:10** 7:10: Mul 20:12; Iphy 5:16; Mul 21:17; Lew 20:9    ‡ **7:15** 7:15: Giak shii ne 16 chodo ro: Yoi bo, chiihphado, nathek shii khoh um arone! (riig bo 4:23).



luii bucho hà dun srane fuang khia din dun phro.” Isu è yao pha ji ne, zab pha michie ne nyachie mua phrone yao ro.

<sup>20</sup> Ai è yao din, “Bran è fuang nyie khia ruii pha ji è zea rab ruii phro. <sup>21</sup> Chiih-è lubu iliing hà awie pha now pha ji ne fuang de khia ruii phro. Jithek è biwo re pha lumuii hà noh dun phro, jithek ne mugo pha, ua, sugoh rek pha ro, <sup>22</sup> siulao rai pha, hanyie shii now bie pha chiih-è, biidiie yao pha, wie è arek pha gidieg rek pha, gai shii buii yao pha, nyigodog, minyiagachi, chiih-è bi-ie blia rek pha miyao ro. <sup>23</sup> Hì-thek zab awie pha muna ne lubu iliing è khia khlei ne ji shii zea rab phro.”

*Hò-amuii jia ro migi*  
(Mth 15:21-28)

<sup>24</sup> Ji è yao ched ne Isu è ithek shii thoh marui srane Thaire beng pha rajan moe hà wuii dun. Ji hà wuii thog mage shii ai ne hò jia shii khud srane ithek è athieg yi pha ug ne rai dun. Ji è rai dun magunde, ai ne thiichiih shii ug ne arai mua. <sup>25</sup> Ibuii ragung jiang pha bimi jia pha amuii è Isu wuii thog pha ji yoi mage ne khthiie wuii srane Isu lai luii shii bam ne yao. <sup>26</sup> Jipha hò-amuii ne Jew asi ro, ai ne Phoenikhia du-ùà Syria pha thiig hà giak pha bimi ro. Ai è Isu shii wad khung ne yao, “Gu dimi shii ibuii ragung è jiang pha ji ne na ne khia maphi bo.” <sup>27</sup> Isu è chang, “Igo bi ani phiing shii yem ne chie yi bo. Aniphiing pha michie yi srane choi shii yem muii pha ji dunmey ne bey?”

<sup>28</sup> Ai è Isu shii chang, “Masdo” “Na miyao jine izai chak ro, jishii aniphiing pha michie thiibliie è

nyiak hà chiih dun pha ji ne choi de nyachie mua phro.”

<sup>29</sup> Ji-è, Isu è aishii yao, “Na ne khthiie hò dun din mage bo, hò pha miyao Chiang è, na dimi pha ibuii ragung jine khia jong ne rai iang pha doh ruii phro.”

<sup>30</sup> Ji è yao mage ne ji pha hò-amuii ne hò dun ne riig shii, ibuii ragung ne izai ai dimi è khia jong dun pha doh ruii phro.

*Isu è bi-ìe jia shii gang phi*

<sup>31</sup> Ji è rek ched marui ne Isu ne Thaire thiig shii thoh din marui ne Sidon pha thiig è dong srane Galili khabang iring shii wuii thog. Chiih-è sua thawunthek rone beng pha ithua è dong ne lua.

<sup>32</sup> Ji hà lua shii giak thek è bi-ìe jia noh ne wuii thog ruii. Ithek è aishii wad è khoh pha Isu shii khung ne yao. <sup>33</sup> Ji-è Isu ne ji pha bran shii awai ji noh dun srane awai wad è khothek shii khoh srane chan cho phi, chiih-è, ji pha bran ri shii de khoh mage. <sup>34</sup> Ji è rek srane Isu è hamangkhung hà riig srane lubu è wie now srane ji pha bran shii yao, “*Ephphatha*,” Hì ne hong mage bo! Iyao pha miyao siu ji ro.

<sup>35</sup> Ji è rekdang pha ji shii ji pha bran ro ikhuii è yoi dang dun, chiih-è, ai sem gliog pha de wie re dang ne agliog pha yao dun. <sup>36</sup> Ji è rek ched pha idoh è Isu ne thiichiuh um pho thek shii ji rek pha ji ne hanyie shii de ayao dang yi pha rek phro. Isu è khama nyuak doh ne ruii, ji è de muna ithek ne yao maphi. <sup>37</sup> Hanyie thek è jithek rek pha ji yoi mage ne zab ne bajo nyu-dang dun ro. Ithek ne awaithek chung yao rai, “Ai ne hò thek rek phane

khi-è mua dun phlei? Ai ne khoh ayoi pho shii de yoi yi dun, sem ayao mua pho de yao mua yi dun!”

## 8

*Isu è itham wi pha bran shii michie phi  
(Mth 15:32-39)*

<sup>1</sup> Din shii de ithek ne Isu miyao nuii pha bajo wuii thog ne rai dun. Chiihphado thiiichiih shii ithek chie pha nyie de oi, jiè Isu ne samoythek shii ho srane yao, <sup>2</sup> “Gu ne hithek pho shii bajo bushun now mua ro, nyieliieshii ithek de gu rog shii rai ne inai da-uom re sharo, jiè chie pha nyie de oi pha re dun ro. <sup>3</sup> Gu è ithek shii nyie magunde aphi achie yi pha lui isloi hò dun din gey arone, yang ne lumuii hà chi-iy ne khriiang ne re mage phro, nyieliieshii giak ne bajo ruang è wuii pha de um phro.”

<sup>4</sup> Ai samoythek è sai, “Ichihi balimuang shii ne ithek nyama shii chie yi pha michie ne khi-è yi mage phlei?”

<sup>5</sup> Isu è sai, “Nathek shii iweb khama um lei?” Ithek è yao, “Sudoh ne iweb miley um bie ro.”

<sup>6</sup> Ai è ithek shii nyiaklieg shii dug pha yung. Chiih-è iweb miley ji yi srane Hamangkhung-aphuii shii laso phi, chiih-è iweb ji phed srane awai samoythek shii phi ne zab shii thang yi. Samoythek de ji è rek phi. <sup>7</sup> Chiih-è, ithek shii ù de ùjia um bie. Isu è ji de yi srane Hamangkhung-aphuii shii laso phi srane, awai samoythek shii phi ne thang yi. <sup>8-9</sup> Itham wi branthek de lumuidang pha iweb chiih-è ù chie phro, chiih-è, ikhe de sirid miley ley um ba dun phro. <sup>10</sup> Ji è rek

ched ne Isu è ithek shii dun ge yi, khthiie ithek ne run jia mua srane ai samoythek rog shii in ne Dalmanutha pha thiig hà wuii dun.

*Pharisithek è buang pha blia rek phi bo ne yung  
(Mth 16:1-4)*

<sup>11</sup> Inai jia shii de Pharisithek ne wuii srane Isu shii khnaing, nyieliieshii, ithek è aishii chai pha now. Ithek è chai hì ne Hamangkhung-aphuii è chua phi rone doh yi pha Pharisithek è aishii buang pha blia rek mage bo è yung. <sup>12</sup> Ji è yung magunde, Isu è lubu iliing hà zud ne khran srane ithek shii yao, “Thuh pha brantheek ne nyie now ne wieng rek yi pha yao phlei? Gu nathek shii izai yao phro, hì è rek pha blia ne gu nathek shii aphi phro.”

<sup>13</sup> Ai è ithek shii thiichiiah thoh marui srane run hà in dinne, khabang thrang pha ithua hà dun marui.

*Pharisithek nane Herod ro phiia  
(Mth 16:5-12)*

<sup>14</sup> Samoythek ne run hà iweb de dau ne chie pha ne bia ne ayie pha wuii dun. Thiichiiah shii iweb ne jia um dang bie. <sup>15</sup> Ji è rek srane Isu è ithek shii phriie ne yao, “Pharisithek phiia nane Herod pha phiia è nathek ne gayiig ne rai iang bo.”

<sup>16</sup> Ithek ne awaithek chung yao rai, “Ai è hì yao pha ne gethek è iweb ayie pha Chiang è yao phro.”

<sup>17</sup> Isu è, ithek nyie yao ramuii pha jine thiegjong muii ne ithek shii sai, “Nathek ne iweb oi pha Chiang è nyie yao rai phlei? Nathek ne thuh de

athieg agao ba bey? Nathek khani ne thuh de adau ba bey? <sup>18</sup> Nathek mieg ne um shii ariig lie ara? Nathek khoh ne um shii ayoi lie ba ara? Nathek ne anow bey? <sup>19</sup> Gu è iweb guii um iang pha ji shii phed srane itham guii pha branthek shii phi ne chie noh chiih-è nathek led pha iweb ne khama ley sirid chiing phlei?”

Ithek è chang, “Snanyi iweb sirid chang ro.”

<sup>20</sup> Ai è ithek shii sai din, “Chiihphado ithek de gu è iweb miley phed ne itham wi shii phi ne chie yi pha ji è led pha sirid khama ley pha chang gieng phlei?”

“Ithek è chang, sirid miley led phro.”

<sup>21</sup> Din ne de ithek shii sai din, “Nathek ne thuh de agao ba bey?”

*Isu è Bethsaida shii miegthi pha jia shii gang phi*

<sup>22</sup> Ithek ne Bethsaida hà wuii thog shii, ithek è miegthi pha jia ne Isu moe shii noh srane Isu shii khung ne yao, “Iujia khoh mage bo” <sup>23</sup> Isu è miegthi pha bran wad chaing srane thiichiih pha thiig è fuang noh srane ai mieg shii chan cho srane wad è khoh ne aishii sai, “Na mieg ne doh sha bey?”

<sup>24</sup> Chiihphado hù ne riig srane yao, “Oh, gune branthek shii doh sha ruii ro, jishii ithek ne hingmuii duiine lua pha doh muii ro.”

<sup>25</sup> Isu è dinne ai mieg shii wad è khoh, chiihphado ai mieg ne idoh thog din ruii ne ai mieg ne wuangwuang doh din dun. <sup>26</sup> Chiihphado Isu è, aishii yao, “Hò hà dun bo chiih-è ji pha thiig hà dinne awuii sha rabo.”

*Phithar è Isu Chiang yaothieg  
(Mth 16:13-20; Lug 9:18-21)*

<sup>27</sup> Chiiphado è Isu chiih-è ai samoythek ne ji pha ithua thoh srane Khaesarea Philipi beng pha thiig moe hà wuii dun. Lumuii hà lua ramuii shii, Isu è ithek shii sai, “Nathek de yao riig bo, ithek è, gu shii hanyie rone yao lei?”

<sup>28</sup> Ithek è chang, “Giak è na shii ne Jon khowo phi pha ji rone yao muii ro, chiih-è, giak ne, na shii ne Elija rone yao muii ro, chiih-è, giak ne, na shii ne chaig rone yao muii ro.”

<sup>29</sup> Ai è ithek shii sai din, “Jishii ithek ne gu hanyie leine now ga?” Phithar è chang, “Na ne Masi ro.”

<sup>30</sup> Ji-è, Isu ne ithek shii yung, “Gu Chiang pha miyao ne hanyie shii de ayao rabo.”

*Isu è awairo diigchiao nane awai iy pha Chiang  
ji yao*

*(Mth 16:21-28; Lug 9:22-27)*

<sup>31</sup> Chiiphado shii Isu è awai samoythek shii yua pha jao din phro, “Bran Dufuii ne bajo riie ne chiih-è dukhothek è de, Phabi boh thek è de, chiih-è, Iphey pha masdothek è de snai muii phro. Aishii ne ithek è ua muii phro, jishii, ai ne iy ne da-uom shii chai hòì din ruii phro.” <sup>32</sup> Hì pha miyao ne Isu è ithek shii sang yao dang phro, ji-è, Phithar è de thekhlei hà noh srane aishii jao ne giung. <sup>33</sup> Jishii Isu è idoh awai samoy shii rei ne riig srane, Phithar shii giung, “Na gu moe è ruang dun mage bo, ibuii,” Ai è yao. “Na munowthek

ne Hamangkhung-aphuii è asi ro jishii na munow jine bran è ro!”

<sup>34</sup> Chiihphado Isu è ibrogthek shii chiih-è awai samoythek shii awai hà ho, “Hanyiemagunde gu rog shii wuii arone, ai ne awai shii bia bi srane, awai bai han ne, gu rog shii wuii gieng bo. <sup>35</sup> Chiih-è hanyie è awai chai shii ragia rek yang pha now arone awai chai ne mua ruii phro, jishii hanyie magunde awai chai gu Chiang shii chiih-è mua yao pha Chiang è iy arone jine ragia re phro. <sup>36</sup> Bran hanyie è de sohjambling pha zab mua srane jishii awai chai shii mua muii arone nyie magunde mua bey? Amua phro! <sup>37</sup> Hì ne bajo chia dun phro, ithek shii ne Hamangkhung-aphuii è chai phég pha igong phi pha de siok pha oi ro. <sup>38</sup> Branthek è awie pha inai chiih-è biidiie pha hamangkhung aphuii ro yua pha inai shii gu muyua shii chiih-è gu shii wo arone, Bran Dufuii yi awai Aphuii ro biisiie ro gang hamangkhliie rog wuii ruii shii ithek shii de wo phro.”

## 9

<sup>1</sup> Chiih-è de ai yao ramuii, “Gu nathek shii yao, ichiih um pha giak branthek weg are ba shii Sajathua pha Hamangkhung-aphuii ne awai blu rog shii wuii ruii pha ji doh ruii phro.”

*Lai pha miyao*  
(Mth 17:1-13; Lug 9:28-36)

<sup>2</sup> Dariig pha idoh shii Isu è awai rog shii Phithar, Jems, chiih-è Jon, chiih-è ithek shii laziung phiing giu hà awai ji bsa hà noh dun. Ithek è aishii riig ramuii shii, Isu ne lai dun ro, <sup>3</sup> chiih-è, airo yung ne imo re srane khlieng chuang ne ichiih sohjambling pho ne hanyie de acham mua sapho rey dun phro. <sup>4</sup> Chiihphado shii samoy uom è Elija chiih-è Moses ne Isu rog shii mulo pha doh ro. <sup>5</sup> Phithar è Isu shii yao, “Masdo, gethek ne ichiih shii um pha ji ne bajo wie ro! Gethek ne ichiih shii haliig uom rab ne, jia yi na shii rab phi, jia yi Moses shii rab phi, chiih-è jia yi Elija shii rab phi haro.” <sup>6</sup> Ai nane gai ijakthek rum ne nyie yao chiid pha ji ne athieg ro.

<sup>7</sup> Chiihphado è sakhamiing thab srane chiih-è ragia rog shii cheg dun phro, chiih-è goh yi sakhamiing è yoi ruii phro, “Hi ne guro bushun pha Dufuii ro, chiih-è aishii nuii bo.” <sup>8</sup> Ithek è khthiie shan ne riig shii, jishii nyie de adoh pha, Isu um pha doh bie phro.

<sup>9</sup> Ithek Phiing è thazam nya dun thog shii, Isu è ithek shii yung, “Sudoh shii nathek è nyie doh pha ji ne bran Dufuii ji iy ne ahòì sapho shii ne, nathek ne hanyie shii de ayao rabo.”

<sup>10</sup> Ithek è ai muyung ji nuii ne rai, jishii awaithek chung ji pha miyao jao ne mulo rai, “Hi ne iy pha ji è nyie khi-èrek ne hòì din phlei?” <sup>11</sup> Chiih-è ithek è Isu shii sai, “Nyie rek ne Iphey yua pho masdothek è Elija ne ibi wuii ruii phro è yao phlei?”\*

---

**9:2** 9:2-7: 2Phth 1:17,18    **9:7** 9:7: Mth 3:17; Mrg 1:11; Lug 3:22

**9:11** 9:11: Mal 4:5; Mth 11:14    \* **9:11** 9:11Mal 4:5,



<sup>12</sup> Isu è ithek shii chang pha ji ne, Elija ne zai zab khriig rek pha chang shii ibi wuii ro. Thuh jigigam shii nyie rek ne Bran Dufuii ne bajo diig re ne snai muui phlei? <sup>13</sup> Jine gu nathek shii yao phro, “Elija wuii thog jong ne chiih-è, branthek è aishii nyie rek yang pha ji rek phro, jigigam è de ai chang shii yao phro.”

*Isu è ibuii ragung um pha bufuii jia shii gang phi  
(Mth 17:14-21; Lug 9:37-43)*

<sup>14</sup> Ithek è gai samoythek rog shii dog mage shii, ithek è bran ibrogthek ne chiih-è Iphey yua pha masdo giak ne ithek rog shii khnaing noh phro. <sup>15</sup> Branthek è Isu shii doh mage shii, ithek ne bajo nyu ne, chiih-è aishii ran sra ilab phi. <sup>16</sup> Isu è awai samoythek shii sai, “Jiphachiang è nathek nyie khnaing rai phlei?”

<sup>17</sup> Bran jia yi ibrog re-è chang, “Masdo, gune guro dufuii na shii noh phro, nyieliieshii aishii ne ibuii ragung um ne ayao mua ro. <sup>18</sup> Ibuii ragung, aishii bangchiie rek mage shii ai ne nyiak hà thud ne, chiih-è ai sem è imamiung khia ne, chiih-è shiinyin de khreig srane, zab gangwieng ne rai dun phro, gu è na samoythek shii ibuii ragung khia phi bo è yao shii ithek ne akhia mua phi ro.”

<sup>19</sup> Isu è ithek shii yao, “Nathek ne migi anow pho bey? Gune nathek rog shii khama phiang rai mua gieng phlei? Gune nathek rog shii khama phiang zud mua phlei? Jipha bufuii shii gu moe hà noh mage bo!” <sup>20</sup> Ithek è aishii Isu moe hà noh.

Ragung è khthiie Isu shii doh mage ne ai è bufuii shii ne sham ba yi, chiihphado nyiak shii fen srane shan ne sem è imamiung khia phro. <sup>21</sup> Isu

è ai aphuii shii sai. “Ai è rek pha ji ne khama re lei?”

Ai è chang, “Ai mirek hì ne ìu è rek ro. <sup>22</sup> Idang aishii ne ibuii ragung è bai hà chiih-è kho hà fen ne ua muii pha rek phro. Na è rek mua arone! Gathek shii bushun rek ne chiih-è gathek nong phi bo.”

<sup>23</sup> Um, Isu è yao, “Nathek è nawaithek shii rek mua arone! Bran hanyie shii migi um pho ne zab nya re mua ruii phro.”

<sup>24</sup> Ai aphuii è khthiie ziak srane yao, “Gune migi um ro, jishii akhriig ba ro, muna um yi pha gu shii nung phi bo!”

<sup>25</sup> Isu è riig shii bran ibrogthek ne ai moe shii nui wuiiramuii, jìè ai è awie pha ragung shii yung mage. Ai è yao, “Khohphang chiih-è sem ayao mua pha ragung wo! Gu nathek shii yung phro bufuii è fuang khia srane, chiih-è, dinne bufuii shii awuii dang sha rabo!”

<sup>26</sup> Ragung è ziak mage, bufuii jine awie dang pha thud sra driiedriie sham ne chiih-è fuang khia dun. Bufuii jine bi-iy duiine doh dun ro, chiih-è zab è yao, “Hì pha bufuii ne iy dun ro!”

<sup>27</sup> Jishii Isu è bufuii shii sieng yi pha awai wad è khoh srane ne noh ne nong phi phro. Chiih-è ai ne riu mua dun.

<sup>28</sup> Isu è hò bucho hà wuii dun pha idoh shii, ai samoythek è aishii ug ne sai, “Nyie rek ne gathek è ragung shii akhia mua lei?”

<sup>29</sup> Isu è chang; Hì è rek ne fuang khia pha ne misia è rek-mua bie phro, gai è rek mua pha nyie de oi ro.

*Isu è awai iy pha miyao ji yao din*  
(Mth 17:22-23; Lug 9:43b-45)

<sup>30</sup> Isu na awai samoythek thiichihih pha ithua thoh srane Galili è wuii dun. Isu è ai khi hà um lei ne athieg yi pha now phro, <sup>31</sup> nyieliieshii ai ne awai samoythek shii yua ramuii: “Bran Dufuii shii ne zum ne hanyie è aishii ua ji pha bran wad shii phi muii phro. Da-uom pha idoh shii hòì din phro, ai ne chai shii sieng din ruii phro.”

<sup>32</sup> Ji è yao magunde, samoythek è ji pha miyao ne agao pha rek ne rai dun, chihih-è, dinne sai pha de rum dun.

*Zab è hanyie bo lei?*  
(Mth 18:1-5; Lug 9:46-48)

<sup>33</sup> Din ne ithek Khaphernaum hà thog srane hò iliing hà khud ne dug shii, Isu è awai samoythek shii sai, “Nathek lumuii hà nyie Chiang è khnaing rai phlei?”

<sup>34</sup> Ji sai magunde, ithek ne nyie de achang phi, nyieliieshii ithek ne lumuii hà zab è hanyie boh um lei ne sai srane khnaing rai phro. <sup>35</sup> Isu è dug srane awai samoy snanyi shii ho srane yao, “Hanyie yi zab è bajo mugak rek yang arone, ai ne zab è lu rek ne gai khiao rek bi bo.” <sup>36</sup> Ji è yao srane, ani jia shii ho srane ithek moe shii noh ne riu yi. Chihih-è ani-shii wad è giak srane yao, <sup>37</sup> “Hanyie magunde, gu beng è hì pha ani shii ho arone, ai ne gu shii de ho ruii phro, chihih-è, hanyie è gu shii ho arone, ai ne hanyie è gu shii thoh ge pha ji shii de ho phro.”

---

**9:34** 9:34: Lug 22:24      **9:35** 9:35: Mth 20:26,27; 23:11; Mrg 10:43,44; Lug 22:26      **9:37** 9:37: Mth 10:40; Lug 10:16; Jon 13:20

*Hanyie è gethek shii gidieg arek pho ne gethek ro ro*

*(Lug 9:49-50)*

<sup>38</sup> Jon è aishii yao, “Masdo, na beng è ibuii ragung khia ne gieng pha bran jia doh ro, jishii, gathek è aishii gak ne thoh marui phro, nyieliieshii, ai ne gethek rog pha bran asi ro.”

<sup>39</sup> Isu è ithek shii yao, “Aishii agak chid rabo” nyieliieshii, hanyie gu beng è buang ji rek phi pha ne, dinne gu shii awie pha miyao ayao ruii phro. <sup>40</sup> Hanyie è gethek shii buii arek pha bran ne gethek ro ro. <sup>41</sup> Gu ne, nathek shii izai yao dang phro, “Hanyie magunde ithek shii gu chiang è kho magunde phi ne niing yi arone, aishii de ji pha lasen ne mua ruii phro.”

*Chujanthek shii layog*

*(Mth 18:6-9; Lug 17:1-2)*

<sup>42</sup> “Hanyie magunde, ichiig oi pha branthek shii mua yi arone, ji pha bran shii ne yua shii rathak boh bang srane khamuii hà fen muii pha ji wie ba phro.” <sup>43</sup> Ji-è ithek wad è migi shii la-ù-ù rey yi arone, ji pha wad ne thamthiak muii, <sup>44</sup> wad nyi um ne thumuluii hà, idang bai shud ne rai pha ithua hà dun pha ji shii ne wad oi pha chai hà dun pha ji wie phro. <sup>45</sup> Chiih-è, nathek lai è ithek migi shii san pha rek ruii arone, ji pha lai shii ne thamthiak ne fen muii bo.† [ <sup>46</sup> Nyieliieshii, lai nyi um srane thumuluii hà fen yi pha ji è

---

**9:40** 9:40: Mth 12:30; Lug 11:23    **9:41** 9:41: Mth 10:42    **9:43** 9:43: Mth 5:30    † **9:45** 9:45: Giak jigi shii 46 chodo ro: Thiisa hà ne ithek shii bisa è chie shii khuchung de a-iy ruii phro, chiih-è bai ithek shii hùb pha ji ne uchungde anyia phro (riig bo 48).

ne, lai oi pha chai hà khud pha ji wie ba phro.]  
<sup>47</sup> Chiih-è, nathek mieg è nathek migi shii la-lu-  
 lu rek noh arone, ji pha mieg ne yog muii bo.  
 Nyieliieshii, mieg nyi um srane thumuluii hà fen  
 yi pha ji re-è ne mieg jia oi ne Hamangkhung-  
 aphuii pha Sajathua pha ithua hà khud muii pha  
 ji wie liak phro, <sup>48</sup> nyieliieshii, bsa thumuluii pha  
 phuyunthek ne khuchung de a-iy phro, chiih-è,  
 shud pha bai ji de khuchung de anyia phro.

<sup>49</sup> “Nyieliieshii, zab pha branthek shii khlem  
 pha ji shii suruii lao srane gang rek pha duiine bai  
 è shud ne sang ruii phro.”

<sup>50</sup> Suruii ne wie ro; jishii ji pha suruii yi aphieng  
 pha re dun arone, dinne ji pha suruii ne khi-èrek  
 ne phieng rab mua phlei?

“Ji-è suruii phieng duiine nawaithek chung de  
 wie rek ne rai bo, chiih-è, nawaithek chung de  
 liijiing rek ne rai bo.”

## 10

*Isu è yiygey che rai pha Chiang Yao*  
*(Mth 9:1-12; Lug 16:8)*

<sup>1</sup> Chiihphado è Isu ne ji pha ithua thoh srane  
 Judea pha du-ua hà wuii dun, chiih-è, Jordan pha  
 gashad hiia ne wuiidun. Thiichiih shii de bran  
 ibrogthek khrab ne wuii thog din ruii, jishii ai è  
 nathek shii idang yao pha duiine yua din phi.

<sup>2</sup> Thiichiih shii giak Pharisithek ne ai moe shii  
 wuii thog srane, aishii chai pha bidiang ne sai,

“Gathek shii yao riig bo, gethek Iphey shii ne, gey è awai yiy shii nyache mua phrone um bey?”

<sup>3</sup> Isu è ithek shii de miyao jia sai din srane chang, “Moses è nathek shii nyie Iphey phi marui phlei?”

<sup>4</sup> Itheck è aishii chang, “Moses è ne hì è zen marui phro, gey è yiy shii che yang pha now arone, che pha jigigam zey srane yiy shii thoh ge bo.”

<sup>5</sup> Isu è ithek shii yao, “Moses è hì pha Iphey ne nathek Chiang zey ro, nyieliieshii, ithek shii yua pha ne bajo diig ro. <sup>6</sup> Jishii jigigam shii zey pha duiine, soh rab pha inai shii Hamangkhung-aphuii è bufuii chiih-è bimi rab ne ruii phro. <sup>7</sup> ‘Jiph Chiang è bufuii ne awai amuii nane aphuii shii thoh marui ne yiy rog dog ne rai dun phro,\* <sup>8</sup> chiih-è, isa ne siu jia re dun phro.’ Ji-è, isa ne bran nyi asi pha, jia re dun phro. <sup>9</sup> Ji-è, branthek ne Hamangkhung-aphuii è miak phi pha ji ne yo arek mua phro.”

<sup>10</sup> Itheck è awaithek hò iliing hà dun thog din mage shii, samoytheck è Isu shii ji pha miyao sai din. <sup>11</sup> Ai è ithek shii yao, “Gey è yiy shii thoh srane gai shii yi din arone, din pha yiy ji Chiang è layog re dun phro.” <sup>12</sup> Ji duiine, yiy de gey shii thoh srane gai shii gey dun arone, ai ne din pha gey Chiang è layog re dun phro.

*Isu è aniphüing shii khirzey phi*  
(Mth 19:13-15; Lug 18:15-17)

---

**10:4** 10:4: Iphy 24:1-4; Mth 5:31    **10:6** 10:6: Igo 1:27; 5:2    **10:7** 10:7,8: Igo 2:24    \* **10:7** 10:7: Giak jigi shii zey ro chiih-è awai iy rog shii ò rek ro.    **10:11** 10:11,12: Mth 5:32; 1Khor 7:10,11

<sup>13</sup> Brantheek è aniphiing shii wad khoh ne khirzey phi yi pha Isu moe hà noh thog ruii phro, jishii, samoy è brantheek shii giung. <sup>14</sup> Isu è ji rek pha doh mage ne, lijieg srane awai samoytheek shii yao, aniphiing shii gu moe hà wuii yi bo, ithek shii agak rabo, nyieliieshii, Hamangkhung-aphuii ro Sajathua ne ithek duiine pho thek ro ro. <sup>15</sup> Gu è nathek shii izai yao phro, “Hanyie è aniphiing duiine Hamangkhung-aphuii Sajathua achoi sapho shii ne khuchung de ji pha ithua adun mua phro.” <sup>16</sup> Chiihphado shii ai è aniphiing shii awai wad è giak srane zab shii wad chaing ne khirzey phi ruii phro.

*Bukho bran jia*

*(Mth 19:16-30; Lug 18:18-30)*

<sup>17</sup> Isu yi awai mirek ji duiine jao ramuii shii, bran jia è ran srane ai ibi shii lagiung niing ne chiih-è aishii sai, “Wie Masdo, gu ne idang pha chai mua pha nyie rek chid phlei?”

<sup>18</sup> Isu è aishii sai, “Na ne nyie rek ne gu shii wie rone ho phlei?” Hanyie de wie oi ro, wie ne Hamangkhung-aphuii bie ro. <sup>19</sup> Na ne muyungtheek ne thieg: bran shii ne sgoh arek rabo, chiih-è, siulao arek rabo chiih-è, mugo agow rabo; chiih-è, gai bran Chiang shii biidiie akhlam rabo; chiih-è gai ro mana shii biidiie khlam ne ayie rabo Chiih-è aphuii nane amuii shii ilab rek bo.

---

**10:15** 10:15: Mth 18:3      **10:19** 10:19: a Mul 20:13; Iphy 5:17; Mul 20:14; Iphy 5:18; Mul 20:15; Iphy 5:19; Mul 20:16; Iphy 5:20; Mul 20:12; Iphy 5:16

<sup>20</sup> Bran ji è yao, “Masdo” “Hì pha muyungthek ne gu ne filiao ba è nuii phro.”

<sup>21</sup> Isu è aishii miang riig srane aishii miie ne yao, “Din ne mana jia chiid dang pha um ba ro. Dun srane na shii nyie um pha ji liu srane bang yi dushothek shii phi muii bo, chiih-è nane hamangkhung hà bukho re ruii phro; chiihphado è na gu rog shii lua gieng bo.” <sup>22</sup> Jipha bran è ji yoi mage shii, ai mizia ne miung srane, chiih-è ai ne duhug è rey dun, nyieliieshii ai ne bajo bukho ro.

<sup>23</sup> Isu è awai samoythek shii shan srane riig ne chiih-è ithek shii yao, “Bukho branthek ne Hamangkhung-aphuii ro Sajathua shii khud phane bajo diig ro.”

<sup>24</sup> Jipha miyaogamthek re-è samoythek ne wiengphleg dun, jishii, Isu è nyayao lumao dun ro, gu aniphiiing wo, Hamangkhung-aphuii Sajathua shii khud phane bajo diig ro! <sup>25</sup> Bukhothek ne Hamangkhung-aphuii pha Sajathua re pha ji shii ne yuaphiang sthuh simen cho è khud pha ji wie ba ro.

<sup>26</sup> Hì è ne samoythek ne zab bajo wieng ne awaithek chung sai rai, “Chiihphado hanyie shii ragia re phlei?”

<sup>27</sup> Isu è ithek shii miang riig srane chang, “Hì ne branthek è are mua phro, jishii, Hamangkhung-aphuii è ne re muii ruii phro. Hamangkhung-aphuii è ne zab nya re muii ruii phro.”

<sup>28</sup> Chiihphado Phithar è yao mage, “Riig mage bo! Gathek ne zab thoh muii srane narog shii lua giang.”

<sup>29</sup> “Um,” Isu è ithek shii yao, “Gu è nathek shii yao, hanyie magunde mua Chiang è hò dinne



khuiino dinne bumuii dinne aphuii ne amuii dinne ani dinne raig thoh arone, <sup>30</sup> ai ne hì pha ishak shii de bajo mua ruii phro. Aishii ne hòthek, khuiino thek, bumuiithek, amuiithek anithek chiih-è raigthek ne wieng chiieng mua din ruii phro, chiih-è diigchiao de mua ruii phro; chiih-è din pha damzi thog shii ai ne idang pha chai mua ruii phro. <sup>31</sup> Jishii thuh ne hanyie giu ithua shii um pho ne luii ithua hà re ruii phro, chiih-è thuh bajo hanyie yi luii ithua hà um pho ne giu ithua hà re ruii phro.”

*Isu è awai iy pha Chiang shii uomchiieng yao  
(Mth 20:17-19; Lug 18:31-34)*

<sup>32</sup> Isu chiih-è ai samoythek è Jerusalem hà wuii pha lumuii è lua ramuii shii. Isu ne ithek è ibi lua ramuii shii, samoythek ne samdiig dun ro; chiih-è, branthek hanyie è ai idoh luagiengpho thek ne zab rum dun phro. Din ne de Isu ne samoy snanyi shii yoh ithua hà noh srane aishii nyie re ruii pha jithek yao phro. <sup>33</sup> Ai è ithek shii yao, “Yoi bo, gethek ne Jerusalem hà wuiiramuii ro, thiisa hà Bran Dufuii shii ne zum srane Phabi wegthek shii chiih-è Iphey yua pha masdothek shii phi muii phro. Ithek è aishii iy yi pha the srane migi arek pho shii phi ruii phro, <sup>34</sup> ithek è aishii makhakriing ne chan cho ne, chia ne, chiih-è ua muii phro; jishii ai ne inai da-uom shii ne chai hà hòì din ruii phro.”

*Jems nane Jon è lia  
(Mth 20:20-28)*

<sup>35</sup> Chiihphado è Zebedi pha dufuii, Jems chiih-è Jon è Isu moe shii wuii srane yao, “Masdo, nyie magunde gasa shii rek phi bo è now ro.”

<sup>36</sup> Isu è isa shii sai, “jine nyie lei?”

<sup>37</sup> Ai è chang, “Na è nawai bran shii khoh mage shii, gasa shii de narog dug yi bo è now ro, jia shii na phazoi hà, jia shii na phawig hà dug yi bo.”

<sup>38</sup> Isu è isa shii yao, “Nasa nyie lia pha ji ne nasa ne athieg mua ro. Nasa de gu è niing pha gog riie ji nyaniing mua ne bey? Chiih-è gu miyi pha khowo riie duiine nasa de khowo riie nyayie mua ne bey?”

<sup>39</sup> Ai è chang, “Gasa de nyayie mau.”

Isu è isa shii yao, izai nasa de gu è niing pha gog riie de nyaniing mua phro, chiih-è gu miyi pha khowo riie de nyawo mua phro. <sup>40</sup> Jishii, nasa shii gu phawig chiih-è phazoi hà dug yi pha rangsua ne gu shii oi ro. Hì pha ithua ne Hamangkhung-aphuii è hanyie shii rab ne ruii phi pha ji shii phi ruii phro.

<sup>41</sup> Gai samoythek sua è ji yoi mage shii, ithek ne Jems chiih-è Jon shii lijieg dun. <sup>42</sup> Chiih-è Isu ithek zab shii ò ho srane yao, “Nathek ne ji pha bran shii thieg, hanyie shii ithek shii blu rek pha migi-arekpho ro bohkhohthek phi muii phro, chiih-è dumuiithek shii ne zab riichai um ro. <sup>43</sup> Hì è rek pha ji ne ithek duchoi shii arek rabo. Nathek è hanyie magunde boh rek yang pha now arone, ai ne gai ro khiao rek bi bo; <sup>44</sup> chiih-è nathek è hanyie magunde ibi re yang pha now arone, ai ne zab pha khiao rek bi phi bo. <sup>45</sup> Bran Dufuii rang

de blia rek yi pha awuii ro; ai ne ithek shii nong phi pha wuii phro, ai ne awai chai phi srane bran bajo shii thoh phi pha wuii phro.”

*Isu è miegthi pha Barthimaeus shii gang phi  
(Mth 20:19-34; Lug 18:35-43)*

<sup>46</sup> ItheK ne Jerikho hà wuii thog ne Isu è samoythek nane bran ibrog rog shii jipha ithua è fuang thoh ne wuiiramuii shii, Thimaeyus pha dufuii Barthimaeus miegthi pha nane chayem jia lumuii shii dug ne rai iang doh ro. <sup>47</sup> Jipha bran è jine Isu Nazareth rone yoi mage shii, Isu shii ziaK ne ho, “Isu, Dawid Saja pha Dufuii wo! Gu shii de bushun now phi bo!”

<sup>48</sup> BrantheK è aishii aro rabo ne bajo giung. Jishii, ai ne din è de gang ziaK ne ho mage, “Dawid pha Dufuii wo! Gu shii bushun noh bo!”

<sup>49</sup> Isu è khan srane yao, “Aishii ho mage bo.”

Ji-è, ithek è miegthi pha bran jishii ho ne yao, “Sang srane jai ne wuii mage bo, Isu è na shii ho muii ro.”

<sup>50</sup> Ji è yao mage ne ai ne awai yung de fen marui srane ran ne Isu moe hà wuii thog ruii.

<sup>51</sup> Isu è aishii sai, “Gune na shii nyie rek phi bo è yang lei?” miegthi pha ji è yao.

“Masdo, gu ne dinne mieg doh mua yi pha yang ro.”

<sup>52</sup> Isu è aishii yao, “Dun mage bo, nawai migi ji è nawai shii gang rek jong phi ro.”

Ji è yao mage shii ai ne mieg doh dun ro. Ji-è, chiihphado ai de Isu rog shii lumuii hà luagieng.

# 11

*Jerusalem hà brantheek bajo sang è Isu shii ho  
(Mth 21:1-11; Lug 19:28-40; Jon 12:12-19)*

<sup>1</sup> Isu chiih-è ai samoytheek ne Jerusalem hà wuiiramuii shii, Bethphach chiih-è Bethany beng pha thawun ne ithek è nui bie ro, ithek ne Sumaro um pha phiing hà wuii srane Isu è samoy nyi shii yung ne ibi thoh ge, <sup>2</sup> Isu è isa shii yung ne ibi thoh ge, “Thrang ibi pha thiig hà wuii srane ji pha thiig hà nasa ne khuchung de bran è a-in dang ba pha bambao jia doh ruii phro. Ji shii sey srane ichiih shii now ruii bo. <sup>3</sup> Ji è rek shii brantheek è sai ruii arone, ithek shii yao mage bo, hène Masdo\* è chiid muii ro, hène jog idoh thoh din ruii phro.”

<sup>4</sup> Isu è ji yao ched ne ji pha samoy nyi ne wuii dun. Thiisa hà wuii thog mage shii Isu è nyie ro è yao pha duiine bambao duii jia ne hò habin shii phang srane ruii iang pha doh. Samoy nyi è ji pha bambao duii shii sey ramuii shii <sup>5</sup> thiichiih riu pha brantheek è isa shii giung, nasa ne hì pha bambao phang ne ruii pha ji nyie rek pha sey ramuii lei?

<sup>6</sup> Ai è ithek shii Isu è khi-èrek ne yua pha ji yao ne chang. Ji nuii ne ji pha brantheek è isa shii ji pha bambao now ne dun ge. <sup>7</sup> Samoy nyi è ji pha bambao shii ne Isu moe shii noh ne dun thog ruii. Thiichiih noh thog shii ithek è yung thek yie ne bambao lakhung shii go phi shii Isu ne ji pha lakhung hà in dun phro. <sup>8</sup> Brantheek è awaithek yung thek hun srane Isu wuii pha lumuii shii wio phi, chiih-è, bran giaktheek è de iphang che

---

\* **11:3** 11:3: Masdo; dinne jine sapho.

srane Isu wuii pha lumuii shii wiao phi. <sup>9</sup> Ibi idoh luagieng pha brantheek è ziaak ne yao, “Hamangkhung-aphuii! Na ne bajo wie ro, hanyie Hamangkhung-aphuii pha ibeng è wuii pha bran jishii ne khirzey phi ara. <sup>10</sup> Hamangkhung-aphuii è Aphuii saja Dawid aphuii pha Sajathua pha ji shii ne khirzey phi phro, Hamangkhung-aphuii na ne bajo wie ro!”

<sup>11</sup> Isu Jerusalem hà wuii thog ne Hamangkhung-aphuii ro Misiahò hà wuii srane zab shan ne riig marui ne Isu chiih-è ai samoythek ne habjuang re dun pha ji è Bethany beng pha ji shii wuii dun ro.

*Isu è iphem hingmuii shii thamiie  
(Mth 21:18-19)*

<sup>12</sup> Jipha thimiang shii, Isu nane ai samoythek ne Bethany è wuiiramuii shii Isu ne bajo chi-iy-iy dun. <sup>13</sup> Ithek ne ùjia ruang ba shii Isu è irab bajo um pha Iphem hingmuii jia doh mage, ji-è, Isu ne ji pha Iphem hingmuii shii iwoi sow pha wuii dun. Ji-è rek magunde, ji pha Iphem ne iwoi awoi ro, nyieliieshii, ji pha hingmuii ne iwoi woi pha ishak are ba ro. <sup>14</sup> Ji-è, Isu ne ji pha Iphem hingmuii shii thamiie, “Sudoh è thiwing ne na iwoi ne hanyie è de achie mua phro!”

Ji è yao phane samoythek de yoi.

*Isu è Hamangkhung-aphuii ro Misiahò hà wuii  
(Mth 21:12-17; Lug 19:45-48; Jon 2:13-22)*

<sup>15</sup> Isu nane ai samoythek ne Jerusalem hà wuii thog mage shii, Isu ne Hamangkhung-aphuii ro Misiahò hà wuii srane chongjai rek pha brantheek

shii giung ne gieng muui srane bang zia rai pha thi-  
 ibliiethek shii de phun ne fen ne chiih-è brantheck  
 hanyie è pharo ruii ne chong rek pha muro thek  
 shii srobro rek ne fen maphi. <sup>16</sup> Chiihphado shii,  
 Isu è brantheck shii Hamangkhung-aphuii Misiahò  
 shii chongjai rek pha manathek shii hanyie shii  
 de ayie yi ro. <sup>17</sup> Chiih-è, brantheck shii yao:  
 “Hamangkhung-aphuii ro jigigam ne hì è zey ne  
 um ro, gu Misiahò ne zab pha brantheck è sia pha  
 hò ro, jishii, ithek è ji pha Hamangkhung-aphuii  
 ro Misiahò ne mugo pho si pha hò rab ne ruii mua  
 ro.”

<sup>18</sup> Boh phabithek chiih-è Iphey yua pha mas-  
 dothek è ji pha miyao yoi mage ne, ithek ne Isu  
 shii ua pha noh, chiihphado è aishii ua pha lumuii  
 sow ne rai. Phabi nane Iphey yua pha masdothek  
 ne Isu shii rum, nyieliieshii bajo brantheck ne ai  
 muyua jishii bajo sangdun ro.

<sup>19</sup> Ji è re ched ne habjuang re sha mage ne Isu  
 chiih-è ai samoythek ne ji pha rajan thoh srane  
 dun din phro.

*Iphem hingmuui è miyao gao*  
*(Mth 21:20-22)*

<sup>20</sup> Din pha thimiang riang, Isu nane ai  
 samoythek ne ji pha lumuii è lua din mage shii,  
 ji pha iphem hingmuui ne iriing è yi dang ne zab  
 goh ne um iang pha doh phro. <sup>21</sup> Diyu nyie re pha  
 ji Phithar ne nowluii srane Isu shii yao, “Masdo,  
 riig mage bo, hì pha iphem hingmuui ne na è  
 thamiie marui pha ji è iy dun ro.”

<sup>22</sup> Isu è ithek shii yao, Hamangkhung-aphuii shii migi rek mage bo. <sup>23</sup> Gu nathek shii izai yao dang phro, hanyie è lubu è migi now srane hì pha phiing shii hùg srane khamuii hà fen bo ne yao na de, jine re dun phro. Jishii, ithek è nyie yao pha ji shii migi now chid phro, chiihphado, re ruii phro, chiih-è ji re pha rek phi phro. <sup>24</sup> Jiphachiang è gu nathek shii izai yao dang phro, “khuchung magunde, nathek migi è Hamangkhung-aphuii shii sia srane nyie lia magunde, nathek jine mua jong rone migi rek bo, chiihphado, nathek è nyie lia pha ji ne phi ruii phro.” <sup>25-26</sup> Nathek jai srane Hamangkhung-aphuii shii sia pha saro arone, misia sia pha ishak shii nathek shii hanyie magunde gidieg rek ne de aishii khung phi bi bo, chiihphado nathek ro asi pha blia rek pha ji de Hamangkhung-aphuii è khung phi phro.

*Isu shii riichai phi pha Chiang è miyao sai  
(Mth 21:23-27; Lug 20:1-8)*

<sup>27</sup> Isu chiih-è ai samoythek dinne Jerusalem shii wuii thog shii, Isu ne Hamangkhung-aphuii ro Misiahò hà wuii ne lua ramuii shii Phabi dukthothek chiih-è Iphey yua pha masdothek chiih-è wegthek è Isu moe shii wuii thog ruii. <sup>28</sup> Chiih-è, aishii sai, “Hì pha blia rek mua pha riichai ne na shii hanyie miphi lei chiih-è hanyie miyao ne rek yi lei?”

<sup>29</sup> Isu è ithek shii chang ne yao, “Gu de nathek shii musai jia sai phro, gu musai ji nathek de chang mua arone gu de nathek shii hì pha riichai

ne hanyie miphi pha ji yao phro.” <sup>30</sup> Gu shii de yao mage bo, “Jon è branthek shii khowo phi pha riichai hanyie miphi lei? Jine Hamangkhung-aphuui miphi bey? Asi pha jine bran phi bey?”

<sup>31</sup> Ji sai mage ne ji pha branthek ne awaithek chung khnaing rai srane Isu musai ji chang pha nung rai dun. Ithek ne awaithek chung yao rai, khi-èrek ne chang sha rai phlei? Gethek è hì ne Hamangkhung-aphuui miphi rone chang arone, ai ne gethek shii yao din ruii phro, ji-arone nathek ne Jon shii nyie rek ne izai anow ga? <sup>32</sup> Chiih-è, hì ne bran miphi rone yao arone, branthek è gethek shii gui noh phro. Ji-è ithek ne rum ne ayao mua pha re dun, nyieliieshii branthek ne Jon ne chaig rone thieg jong dun. <sup>33</sup> Ji-è, ji pha branthek ne Isu shii athieg rone chang thog ruii.

Ji-è Isu de ithek shii yao, “Chiihphado gu de nathek shii hì pha riichai è gu shii blia rek pha hanyie miphi ji gu de ayao phro.”

## 12

*Isu è awie pha boh raigpho pha phaluui yao  
(Mth 21:33-36; Lug 20:9-19)*

<sup>1</sup> Isu è ithek shii najang shan ne yao: Luangjia shii bran jia è angur raig hai, chiih-è raig shii shan ne muthua thua srane, angur shii chab ne chui ne ikho rey pha nyahiung chog, chiih-è riigpho shii rai yi pha haliig giu jia rab phro. Chiihphado è angur raig cheipho shii phi srane hò thoh marui ne lua dun. <sup>2</sup> Angur khrab pha ishak thog mage shii, cheipho è awai mathang yamiing yi pha ai



è awai khiao shii thoh ge phro. <sup>3</sup> Raig cheipho è khiao ji shii zum srane zuang mage, chiih-è nyie de aphì pha idoh thoh din ge. <sup>4</sup> Chiiphado shii muspho è khiao gai shii thoh ge; raig cheipho è aishii de khrug lakhung shii zuang srane biwo rek ne thoh ge. <sup>5</sup> Jìpha muspho è dinne gai khiao thoh ge, chiih-è aishii de ua muui phro; chiih-è ithek gai shii duiine bajo awie pha rek phro, chiih-è giak shii zuang ne giak shii ne ua muui phro. <sup>6</sup> Idoh noi shii jia led dang bie ne thoh ge pha ji ne awai è miie pha awairo dufui ro, ai è awai dufui shii cheipho hà thoh ge, ai è yao, gune luthong phro ithek ne gu dufui shii ne ilab phi phro. <sup>7</sup> Jishii cheipho è awaithek chung yao rai, hì ne muspho ro dufui ro. Thawui ne ua rai haro, chiih-è ai ro nurui thek ne gethek ro rey phro! <sup>8</sup> Ji-è, ithek ne dufui shii zum srane ua ne chiih-è cheipho è ai siu shii angur raig è fuang fen muui phro.

<sup>9</sup> Isu è sai, “Chiiphado shii, muspho è cheipho shii nyie rek phlei?” Ai ne wui ne ua srane raig gai cheipho shii phi muui phro. <sup>10</sup> Nathek de hì pha jigigam atham bey?

Rungpho è lubao awie rone snai muui pha ji shii  
ne

zab è de mugak re dun phro.

<sup>11</sup> Jine Ithong mirek ro,  
jine bajo wie pha mieg shii ro.

<sup>12</sup> Jewish dumuiithek ne Isu shii zum pha bid-  
iang phro, nyieliieshii ithek ne thieg ai miyao  
najang shan ne ithek gidieg shii yao phrone thieg,  
jishii ithek ne ibrogthek rum, jiè ithek aishii thoh  
marui ne rek dun.

*Mijin phi pha Chiang shii musai sai*  
(Mth 22:15-22; Lug 20:20-26)

<sup>13</sup> Pharisithek chiih-è Herod pha brantheek yi Isu hà thoh ge srane musai rog shii chua phro.

<sup>14</sup> Itheek aishii wuii srane sai, “Masdo, gathek ne thieg nane izai yao phro, nane brantheek è nyie now na de sam-adiig pha yao phro, brantheek ro ilab shii de nyie ilab aphì pha rek ro. Jishii brantheek shii Hamangkhung-aphuii muyang pha Chiang shii nane izai yao phro, Gathek shii yua riig bo Romantheek saja dumuii shii mijin phi pha ji ne gethek Iphey shii buii bey? Gathek ne ithek shii nyaphi ne ba asi aphì chiid haba?”

<sup>15</sup> Jishii Isu è ithek ro khua ji è riig srane chang, “Nathek nyie rek ne gu shii chua pha bidiang phlei? Bang shikhi jia yi mage bo, chiih-è gu riig-riig haro.”

<sup>16</sup> Itheek è aishii jia yi ne phi, chiih-è ai è sai, “Hanyie mizia chiih-è hanyie ibeng lei.” Itheek è chang, “Hì ne Roman thek saja dumuii ro ro.”

<sup>17</sup> Isu è ithek shii yao, “Chiihphado, hì ne wie ro, nyie yi saja dumuii è re pha ji ne saja dumuii shii phi muui bo, chiih-è nyie yi Hamangkhung-aphuii è re pha ji ne Hamangkhung-aphuii shii phi muui bo.”

Chiih-è ithek ne Isu shii wiengphleg dun ro.

*Iy pha ji è hòì pha musai ro*  
(Mth 22:23-33; Lug 20:27-40)

<sup>18</sup> Chiihphado shii Sadusithek hanyie è iy pha ji è ahòì phrone yao phothek ne Isu moe shii wuii srane yao, <sup>19</sup> Masdo, Moses è hì pha Iphey ne

gathek shii zey phi phro: Bran jia è yiy yi ne, ani agiak pha iy dun, ai ikhunii è ji pha misiung shii yiy ne ani giak arone, ji pha ani ne iy dun pha ro nyare yi bo. <sup>20</sup> Luangjia shii khuiino miley um; zab è khoh ji è yiy yi srane ani agiak pha iy dun. <sup>21</sup> Chiihphado shii din pha ikhunii ji è de ji pha hò-amuii shii yiy, chiih-è ai de ani agiak pha iy dun. Uomchieng pha khuii shii de ithek shii nyie re pha ji duiine re phro, <sup>22</sup> chiih-è chiihphado shii gai thek, zab khuiino miley è ji pha hò-amuii shii yiy srane ani agiak pha iy dun. Zab pha idoh shii ji pha hò-amuii de iy dun. <sup>23</sup> Chiihphado shii, iy pho yi zab hòi pha Inai sieng mage shii, ithek miley è yiy pha hò-amuii ji ne, hanyie ro yiy re phlei?

<sup>24</sup> Isu è ithek shii chang, “Nathek ne asi pha brantheke ara! Nyieliieshii nathek ne hì pha Hamangkhung-aphuii ro jigigam chiih-è ai richai shii athieg mua phro. <sup>25</sup> Iy pho thek hòi din mage shii, ithek ne, hamangkhliie duiine re ne hamangkhung hà ne yiy ayiy phro. <sup>26</sup> Iy pho ne hòi ruii phro, ithek ne jabiing hòi pha Moses ro Jigigam ji shii atham bey? Thiichiih shii zey phro Hamangkhung-aphuii è Moses shii yao, ‘Gune Abraham ro Hamangkhung-aphuii ro, Isakh ro Hamangkhung-aphuii ro, chiih-è Jakhob ro Hamangkhung-aphuii ro’ Ai è ji yao shii ne bajo idam ibi hà ithek ne iy jong ro. <sup>27</sup> Hamangkhung-aphuii ne brantheke ro Hamangkhung-aphuii ro, jiè hanyie iy dun magunde thuh de isieng ba ro, jishii iy pho ro asi ro. Nathek ne zab adunmey pha now ro!”

*Zab è boh muyung*  
(Mth 22:34-40; Lug 10:25-28)

<sup>28</sup> Thiichiih shii um pha Iphey yua pha masdo jia è ithek mulo ramuii pha yoi. Ai è Isu yi Sadiusithek shii ne wie è chang pha doh, jiè ai ne Isu shii musai sai: “Nyie muyung ne zab è de mugak ba lei?”

<sup>29</sup> Isu è aishii chang, “Zab è mugak muyung ne hì ro, ‘Israel pho! yoi mage bo, gethek ro Ithong\* Hamangkhung-aphuii ne jia bie ro. <sup>30</sup> Nawai Hamangkhung-aphuii shii nawai lubu è, nawaithek ragung è, nawaithek khani è, nawaithek chua rog shii è miie mage bo.’ <sup>31</sup> Chiih-è nyichiieng pha mugak muyung ne hì ro: ‘Nawaithek ro hadung-haluii pho shii de nawaithek chung miie rai pha duiine miie bo.’ Thiichiih è ne nyi ji è boh gai mugak muyung oi sha ro.”

<sup>32</sup> Iphey yua pha masdo ji è Isu shii yao, masdo! “Wie ro, hì ne izai chak ro, na è yao pha ji ne, Ithong ne Hamangkhung-aphuii bie ro, chiih-è, gai Hamangkhung-aphuii ne oi ro, jishii ai jia bie ro” <sup>33</sup> Chiih-è brantheke ne Hamangkhung-aphuii shii awaithek lubu è awaithek khani è awaithek chua è miie chiid phro, chiih-è awaithek shii miie pha duiine hadung-haluii pho shii de miie chiid phro. Hì pha muyung nyi nuii ne rek pha ne miiram ua ne Hamangkhung-aphuii shii khlem ne zid phi pha ji è de bajo boh muyung ba ro.

**12:28** 12:28-34: Lug 10:25-28      **12:29** 12:29,30: Iphy 6:4,5

\* **12:29** 12:29: Ithong gethek ro Hamangkhung-aphuii Ithong bie ro; dinnelthong gethek ro Hamangkhung-aphuii, Ithong awaiji.

**12:31** 12:31: Lew 19:18      **12:32** 12:32: Iphy 4:35      **12:33** 12:33: Hos 6:6

<sup>34</sup> Isu è nuii shii ji pha bran miyao ne wie ro, “Na ne Hamangkhung-aphuii ro Sajathua è muna ruang asi sha phro.”

Ji è yao ched mage ne zab ne rum ne Isu shii musai asai mua.

*Masi Chiang pha musai  
(Mth 24:41-46; Lug 20:41-44)*

<sup>35</sup> Isu ne Hamangkhung-aphuii ro Misiahò shii miyao yua ne rai srane brantheK shii musai jia sai ruii, nyie khi-èrek ne Iphey yua pha masdothek ne Masi ne Dawid Saja pha riing rone yao mua phlei?

<sup>36</sup> Dawid shii Hamangkhung-aphuii ro Ragung è yao yi phro:

Ithong è gu Ithong shii yao;

Gu è na shuangthek shii gu lai luii aruii sapho ne

Na ne guro phazoi pha riichai ithua shii dug bo.

<sup>37</sup> Dawid awai de aishii ne Ithong rone ho, jiè nyie khi-èrek ne Masi ne Dawid ro riing re mage phlei?

*Isu è iphey pha gidieg masdothek shii phriie  
(Mth 23:1-36; Lug 20:45-47)*

Bran ibrogthek ne Isu miyao ji sang ne nuiira-muii ro. <sup>38</sup> Isu è ithek shii yua, ai è yao, “Iphey yua pha masdothek è ragia rek ne rai bo, ithek ne yung phiang rog shii lua ne brantheK shii riig yi pha bajarai ithua hà ilab phi yi pha rek phro.

<sup>39</sup> Misiahò hà wuii ne de ithek ne mugak biang shii ong ne chiih-è michie-chie pha ithua shii biang wie shii ong ne dug phro. <sup>40</sup> Ithek ne misiung thek

phua yi srane chiih-è ithek hò de rio maphi, chiih-è ithek ne brantheke wie rone riig yi pha misia de phiang sia phro. Itheke zab shii ne bajo awie pha re ruii phro!”

*Misiung ro mizid*  
(Lug 21:1-4)

<sup>41</sup> Isu yi Hamangkhung-aphuii ro Misiahò pha mizid gam moe shii dug ne rai ramuii shii, ai è bukho brantheke ne bajo bang zid pha doh ruii; <sup>42</sup> chiihphado shii dusho misiungmuii jia wuii ne bang ùjia chab phro. <sup>43</sup> Ji è doh mage ne Isu è awai samoytheke shii awai moe shii ho srane yao, “Gune natheke shii izai yao dang phro, hì pha dusho misiung ne mizid pha gam ne bran shii gai re-è ne zab è de bajo muna zid phro. <sup>44</sup> Gai theke ne awaitheke shii nyie um pha ji è ùjia yi srane zid bie phro, jishii ai ne dusho magunde awaishii nyie um thith pha ji yi srane zab zid muii phro.”

## 13

*Isu è Hamangkhung-aphuii ro Misiahò ji chuak pha yao*

(Mth 24:1-2; Lug 21:5-6)

<sup>1</sup> Isu ne Hamangkhung-aphuii ro Misiahò ji thoh srane dun ramuii shii, ai samoy jia è aishii yao, “Masdo, hì pha lubao chiih-è hòtheke ne bajo khie doh muii ro.”

<sup>2</sup> Isu è aishii chang ne yao, “Natheke ne hì pha boh lubao hò ne riig iang bo! Doh jia shii ne hì pha hòtheke pha lubaotheke ne jia de khim ne arai mua pha zab chuak dun phro.”

*Gu samoythek shii ne diig chiih-è riie rey ruii phro*

*(Mth 24:3-14; Lug 21:7-19)*

<sup>3</sup> Isu ne ji pha Hamangkhung-aphuii ro Misiahò pha khlei pha sumaro phiing shii dug ne rai shii, Phithar, Jems, Jon chiih-è Andrew ne aishii ug ne wuii thog ruii. <sup>4</sup> Ithek è aishii yao, “Gathek shii yao phi bo, ji pha inai ne khuchung thog ruii phlei? Chiih-è, ji pha inai thog sha ruii rone thieg yi pha gathek è nyie doh shii ji pha inai ne re phlei?”

<sup>5</sup> Isu è ithek shii yao, nathek ne nowbthan ne rai iang bo, chiih-è brantheck è ithek shii akhin-aring yi rabo. <sup>6</sup> Bajo brantheck è ithek shii yao ruii phro, gune ji pha Masi ro! Bran bajo thek ne gu beng è yi ne khinrin ruii phro. <sup>7</sup> Chiih-è, nathek ne mak thek inui thog pha yoi mage shii, chiih-è mak ruang hà thog pha mua yoi mage shii, nathek ne aram chid rabo. Jithek ne izai re ruii phro, jishii, jine jong pha ishak thog sha rone asi ro. <sup>8</sup> Du-ùa chung de gui rai ruii phro; zab ithua thek chung de gui ruii phro, thiichiih shii zab hà sajid sham ne, chiih-è zab pha chieniing pha thek oi pha diig re ruii phro. Jithek ne hò-amuii thek è ani giak pha ibi shii riie pha duine diig ruii ro.

<sup>9</sup> Nathek ne nawaithek shii nowbthan srane bujuui ne rai iang bo. Nathek shii de zum ne limiang hò hà noh srane Jewthek misiahòthek shii zuang ruii phro; nyieliieshii gu shii nuii pha Chiang è nathek shii ne dumuiithek chiih-è saja thek moe shii noh ne ithek ro migi Chiang ji yao

yi phro. <sup>10</sup> Ai ne zab pha ibi shii guro miyao wie hìne zab brantek shii chiih-è zab pha du-ùathek shii yao ched bi phro. <sup>11</sup> Khuchung magunde, nathek shii zum srane limiang moe shii noh dun shii, nathek ne khi-èrek ne yao sha phlei! Inow ne arum chid rabo; nyieliieshii, ji pha idoh shii ne nathek shii yao mua pha lumuii phi ruii phro; nathek è nyie yao pha miyaogam ne ithek miyao pha asi phro, ji ne Hamangkhung-aphuii Ragung è yao gieng phro. <sup>12</sup> Khuino chung magunde, zum srane ua yi pha phi muui phro, aphuii è ani shii de ji è rek ruii phro, aniphiingthek de awaithek pha aphuii amuii shii ji è rek ne ua muui phro. <sup>13</sup> Zab brantek ithek shii gu Chiang è snai ne chiih-è ariig yang pha rek ruii phro, nyieliieshii ithek è gu shii migi rek phro. Jishii, hanyie è awai migi shii zab pha inai thog dang pha rek pho ne ragia re ruii phro.

*Zeanakhurei pha zia jia*

*(Mth 24:15-28; Lug 21:20-24)*

<sup>14</sup> “Nathek ne doh ruii phro, akhie dang pha ibuii jia yi khi hà ai arai pha ji shii riu ruii phro.” Thampho ne hì thieg bo: Hì pha miyao ne nyie yao pha ji ne thieg pha bidiang bo. Chiihphado shii hanyie ne Judea pha ithua hà um lei ne ithek ne phiingthek hà ran dun phro. <sup>15</sup> Bran hanyie yi awai hòzak hà um pho ne buzam awai hò iliing hà dun ne mana yi pha ishak amua rabo. <sup>16</sup> Bran hanyie ne raig hà um pho ne awaithek yung yi pha idoh hò hà adun rabo. <sup>17</sup> Hò-amuii hanyie ani

---

**13:13** 13:13: Mth 10:22      **13:14** 13:14: Dan 9:27; 11:31; 12:11  
**13:15** 13:15,16: Lug 17:31



wiig ne chiih-è ani ùu um pho ne ji pha inai shii ne bajo diig phro! <sup>18</sup> Jipha ishak ne hakhanshak shii are yi pha Hamangkhung-aphuui shii sia bo! <sup>19</sup> Hì thek pha diig inai ne, Hamangkhung-aphuui è igobi sohjambling rab dang pha ishak è yi ne thuh thog pha hanyie è athieg ba pha awie dang pha diig ji thog ruii phro. Ji re pha idoh shii ji duiine mia pha diig ne dinne are phro. <sup>20</sup> Jishii Hamangkhung-aphuui è diig pha inai shii ne la-ùu-ùu rek phi phro; ai è ji arek arone, hanyie de asieng mua phro. Jimagunde awai è gua pha brantheck Chiang shii inai la-ùu-ùu rek phi phro.

<sup>21</sup> Chiihphado è, hanyie magunde nathek shii yao, riig bo, ichiih shii ne Masi um ro! Din ne, riig bo, the jine Masi rone yao na de! Jishii aishii migi arek rabo. <sup>22</sup> Biidiie pha Masi chiih-è biidiie pha chaigtheck ne khia ruii phro. Ithek ne are mua pha bliatheck rek ne chiih-è buangtheck ji rek ne, chiih-è rek mua arone, Hamangkhung-aphuui è gua pha brantheck shii khinrin pha nyiu phro. <sup>23</sup> Gu miyao pha miyao Chiang hì ne nawaithek shii ragia rek ne chiih-è saro bo.

*Bran dufuii wuii din ruii pha jigigam*  
(Mth 24:29-31; Lug 21:29-33)

<sup>24</sup> Diig pha ishak inai pha idoh ne inai ne igiia re dun phro, chiih-è habie de achuang pha re dun phro, <sup>25</sup> Dadiangtheck de hamangkhung è thazam chiih ruii phro, chiih-è hamangkhung pha riichaithek de sham ruii phro. <sup>26</sup> Chiihphado

---

**13:19** 13:19: Dan 12:1; Dng 7:14      **13:24** 13:24: Aij 13:10; Jol 2:10,31; 3:15; Dng 6:12; Aij 13:10; Ezkh 32:7      **13:25** 13:25: Aij 34:4; Dng 6:13; Jol 2:10      **13:26** 13:26: Dan 7:13; Dng 1:7

Bran Dufuii khia ne, biisiie nane boh blu rog shii sakhamiing shii wuii ruii phro. <sup>27</sup> Ai è hamangkhliethek shii soh pha iring wi shii thog pha thoh srane sohnyiak iring jia pha iring è jia pha iring thog pha ithek shii Hamangkhung-aphuii mugua pha bran shii khrab yi phro.

*Iphem hingmuii ro miyao*  
(Mth 24:32-35; Lug 21:29-33)

<sup>28</sup> “Jipha Iphem hingmuii è nathek shii id yi phro. Ji pha iphem hingmuii ro idiphak ire re ne chiih-è jum re mage shii irab jao ne nyu ruii phro. Nathek ne thieg phro halua idam ne inui re sharuii rone. <sup>29</sup> Ji duiine, nathek è ji re pha doh mage shii, nathek ne thieg, jao pha ishak inui sha ro. \* <sup>30</sup> Now bo, hìthek re mage shii ichiih um pha ithek giak bran ne isieng ba phro. <sup>31</sup> Hamangkhung chiih-è sohnyiak ne san dun phro, jishii gu miyaogamthek ne khuchung de asan phro.”

*Hanyie de ji pha inai chiih-è ijak shii athieg phro*  
(Mth 24:36-44)

<sup>32</sup> “Jishii hì pha inai chiih-è ishak thog pha ji ne hanyie de athieg mua phro Hamangkhliethek de chiih-è Dufuii de athieg mua phro; ji pha inai thog ruii pha ne Hamangkhung-aphuii awai è thieg bie ro. <sup>33</sup> Wie riig srane nowbthan ne rai iang bo, chiih-è ji pha inai thog ruii phane nathek athieg phro. <sup>34</sup> Jipha inai ne ji duiine phro, Bran jia hanyie è awai khiaothek shii dumuii phi srane

---

\* **13:29** 13:29: ishak noi sha ro, jao pha saro hà bo; dinneai ne noi sha ro, dun pha saro sha bo. **13:32** 13:32: Mth 24:36 **13:34** 13:34: Lug 12:36-38

chiìh-è zab pha khiao shii nyie rek chid pha ji yao ne chiìh-è hò khan pha bran shii hò wie riig bo è yao ne awai hò thoh marui ne wuiidun. <sup>35</sup> Chiìhphado è, nowbthan bo, nyieliieshii hò pha musphò ne khuchung thog ruii pha ji ne nathek ne athieg phro yangne ne ai ne habjuang shii dun ruii pha de um phro, yangne ai ne habiu duchoi shii de dun ruii pha de um phro, dinne, yangne ai ne hasiang asiang ba ibi shii thog ruii pha de um phro, yangne ai ne hasieng sieng pha idoh shii thog ruii pha de um phro. <sup>36</sup> Ai ne hamblo shii dun thog mage shii nathek ne amen iang rabo. <sup>37</sup> Chiìhphado, gu nathek shii nyie yao pha ji ne, gu zab shii yao ne: nowbthan ne rai iang bo ne yao phro.”

## 14

*Branthek è ua pha lumuii sow pha bidiang phro  
(Mth 26:1-5; Lug 22:1-2; Jon 11:45-53)*

<sup>1</sup> Hì ne buii Hiìadun Sai pha chiìh-è Phiia ajiie pha Iweb chie muii pha danyi ibi shii ro. Boh phabithek chiìh-è Iphey yua pha masdothek è ug ne Isu shii zum pha rek phro, chiìh-è ua pha rek phro. <sup>2</sup> Ithek è yao rai, “Gethek ne sai pha inai shii arek haro dinne ji è rek mage shii branthek è gethek shii gui noh mage phro.”

*Bethany hà Isu ro khrug shii thiiliie shun  
(Mth 26:6-13; Jon 12:1-8)*

<sup>3</sup> Jipha ishak Isu ne Bethany pha ithua hà Simon ro hò shii ro, chiìh-è ji pha bran ne bajo awie

pha hìa è rei phro. Isu chie ramuii shii, hò-amuii jia ne igang iwoi è rab pha bajo rem noh pha thiiliie sasia chiuh-è bajo igong um pha yi ne wuii thog ruii phro. Jipha hò-amuii è sasia ji chui srane bajo rem noh pha thiiliie ne Isu khrug shii shun phi. <sup>4</sup> Giak branthek è aishii riig ne bajo lijieg ne awaithek chung yao rai, “Nynie rek ne nyama igong um pha chiuh-è bajo rem noh pha thiiliie ne aishii shun ne mua muii phlei?” <sup>5</sup> Jipha bajo rem noh pha thiiliie ne hò-amuii è liu arone idam jia pha riinang\* mua ne ji pha bang ne dushothek shii phi liak pha ji wie phro!” Chiuh-è ithek è hò-amuii ji shii awie dang pha giung phro.

<sup>6</sup> Jishii Isu è yao, aishii ji thoh muii bo, nyie rek ne nathek ne aishii afak-afi rek phlei? Ai ne gu shii bajo wie chiuh-è khie blia rekramuii ro. <sup>7</sup> Dusho bran ne nathek rog shii idang um ruii phro, nathek ne ithek shii khuchung magunde yang shii nya nong phi bo. Jishii gune idang nathek rog shii oi phro. <sup>8</sup> Ai è nyie rek mua pha ji rek phi phro; ai è gu siu bajo rem noh pha thiiliie shun phi ne ibi shii gu wieng pha ishak khriig rek phi. <sup>9</sup> Thuh, gune nathek shii izai yao dang phro: Zab pha sohjambling shii guro Mua Wie ji yua mage shii, ai è nyie rek phi pha ji ne, aishii nowkhlei yi pha yao ruii phro.

*Judas è Isu shii zum yi pha nuii  
(Mth 26:14-16; Lug 22:3-6)*

<sup>10</sup> Chiuhphado, samoy snanyi è jia Judas Iskhar-  
ioth yi boh phabithek shii wuii ne Isu shii khi-èrek

---

\* **14:5** 14:5: liiman bang smed: riig 6:37    **14:7** 14:7: Iphy 15:11

ne zum pha ji ithek shii nung gieng. <sup>11</sup> Ai miyao ji nuui ne phabithek ne nyu dun, chiih-è aishii bang phi pha sbang rek. Ji-è Judas nyie khi-èrek ne Isu shii chua wie mua ne ithek wad shii zum yi pha jao ne sow phro.

*Isu buii hiìadun pha michie chie*

*(Mth 26:17-25; Lùg 22:7-14,21-23; Jon 13:21-30)*

<sup>12</sup> Phiia ajiie ba pha iweb Sai pha michie chie pha igobi inai shii, Hiìadun pha michie shii shiishaithek ua shii, samoythek è Isu shii sai, “Gathek shii khihà wuii ne naro buii Hiìadun pha michie ji khriig rek iang bo è yang lei?”

<sup>13</sup> Chiihphado Isu è samoy nyi shii muyung rog shii thoh ge: Rajan hà wuii ne, chiih-è nasa ne kho jariie han pha bran jia si ruii phro, nasa ne ji pha bran rog shii luagieng ne <sup>14</sup> ai khi pha hò shii khud dun pha hò muspho shii yao bo, Masdo è yao muii ro, gu samoy chiih-è gu dug ne Hiìadun pha michie chie pha ùgud ne khi hà lei? <sup>15</sup> Chiihphado ai è ithek shii ne bajo bo lakhung ikhuno pha ùgud jishii chie pha zab saro ne ruii pha doh ruii phro. Nathek ne thiisa hà michie saro iang bo.

<sup>16</sup> Samoythek è thoh srane, rajan hà wuii thog, chiih-è Isu è ithek shii nyie khi-è yao pha ji duiine zab saro ne um iang pha doh phro; chiih-è nathek è Hiìadun pha ji Sai pha michie saro phro.

<sup>17</sup> Habjuang re sha shii, Isu awairo snanyi samoythek rog shii ji pha ithua hà wuii thog. <sup>18</sup> Ithek è thiibliie hà chie pha dug shii, Isu è ithek-shii yao, “Gu nathek shii yao phro, ichiih gu rog

shii chie gieng pha samoy jia è gu shii guro mak pho shii phi muui phro.”

<sup>19</sup> Ji-è yao mage ne, samoythek ne zo ne jia pha idoh shii jia è aishii sai, “Ji ne izai gu asi bey?”

<sup>20</sup> Isu è ithek shii chang, “Ai ne samoy snanyi è jia ji phro, hanyie è airo iweb yi guro shiikhiia rog shii wo gieng phro. <sup>21</sup> Bran Dufuii ne jigigam shii zey ne um pha ji duine iy ruii phro. Jishii, hanyie è Bran Dufuii shii guro makpho shii phi pha jine khama awie dang pha re ruii phro. Ji pha bran shii ne khuchung de agiak arone ji wie ba phro!”

### *Ithong ro michie*

*(Mth 26:26-30; Lug 22:14-20; 1Khor 11:23-25)*

<sup>22</sup> Ithek ne chie pha dug mage shii, Isu è iweb jia chiing srane Hamangkhung-aphuii shii sia ne Laso phi ne chiuh-è ji srane iweb awai samoythek shii phi. Ai è yao, “Choi mage bo, hène guro siu ro.”

<sup>23</sup> Chiuhphado ai è gog shii chiing srane Hamangkhung-aphuii shii Laso phi ne ithek wad shii phi; chiuh-è ithek zab ji pha gog è niing phro. <sup>24</sup> Isu è ithek shii yao, “Hì ne guro ifai ro! Guro hì pha ifai ne bame brantheek shii thoi phi phro, guro ifai ne Hamangkhung-aphuii awai shiinyie shii ruii phro.” <sup>25</sup> Gune nathek shii yao phro, “Gu ne hì pha angurphuii ji Hamangkhung-aphuii ro Sajathua pha phuii iwo ji aniing sapho shii khuchung de aniing phro.”

<sup>26</sup> Chiuhphado ithek sthun bai srane Sumaromuang pha Phiing hà wuii dun.

*Isu è yao Phithar ne airo samoy asi ro khlam ro  
(Mth 26:31-35; Lug 22:31-34; Jon 13:36-38)*

<sup>27</sup> Isu è ithek shii yao, “Nathek ne gu shii thoh srane yo dun phro, Jigigam shii yao, ‘Hamangkhung-aphuii è brogpho shii ne ua muii phro, chiih-è ai shiishaithek ne dayiingdayang re dun phro.’ <sup>28</sup> Jishii gune dinne chai sieng shii, gune ithek ibi shii Galili hà wuii ruii phro.”

<sup>29</sup> Phithar è Isu shii chang, “Gai è na shii thoh marui ne de gu ne khuchung de na shii athoh phro!”

<sup>30</sup> Isu è Phithar shii yao, “Gu na shii yao, sudoh biu khephuii nyichiieng ò pha ibi shii nane gu shii athieg ro è uomchiieng yao ruii phro.”

<sup>31</sup> Phithar ne din è de lahuhuak gang chang, “Gune narog shii iy magunde gune ji è ayao phro!”  
Chiih-è, zab samoythek è de ji-duiine yao phro.

*Isu è sia pha ithua jine Gethsemani beng  
(Mth 26:36-46; Lug 22:39-46)*

<sup>32</sup> Ithek ne Gethsemani ho muii pha ithua shii wuii thog srane Isu è awai samoythek shii yao, “Gu siaramuii shii nathek ichiih dug bo” <sup>33</sup> Ai è Phithar, Jems, chiih-è Jon shii awai rog shii noh dun. Aishii ne duhug chiih-è diig thog mage phro, <sup>34</sup> Chiih-è, ai è samoythek shii yao, “Gu lubu pha zo jine bajo boh è gu shii ne achihih iy bsa hà re dun ro. Ji-è nathek ne ichiih rai ne, chiih-è amen pha khriig rek iang bo.”

<sup>35</sup> Ai ithek è ùjia ruang wuii srane nyialieg hà phieng srane sia, na è re muii arone, aishii ne riie

pha ishak ji è awuii yi rabo. <sup>36</sup> Ai è sia “Aphuii” “Gu Aphuii! Na shii ne zab re mua ruii phro. Hi pha riie gog ne gu è yi muii bo. Thuh de gu è nyie yang pha ji asi ro, jishii na è nyie yang pha ji è ro.”

<sup>37</sup> Chiihphado ai è idoh dun ne riig shii samoy uom ne men iang pha doh phro. Ai è Phithar shii yao. Simon Phithar nane men muii bey? Ishak jia de sieng ne arai mua bey? <sup>38</sup> Chiih-è ai è ithek shii yao, “Khriig rek, chiih-è chuajan hà achihi yi pha sia mage bo. Chiih-è ragung ne rek yang, jishii siu ne zia ro.”

<sup>39</sup> Ai din ne wuii dun srane ibi hà yao pha miyaogam ji yao ne sia. <sup>40</sup> Chiihphado ai idoh awai samoythek hà dun shii ithek ne men pha doh iang; ithek ne mieg de ayang mua. Chiih-è aishii nyie yao chiid pha ji ne ithek ne athieg mua ro.

<sup>41</sup> Ai Uomchiieng idoh dun thog shii, ai è samoythek shii yao, “Nathek ne thuh de men ne chiih-è thung bamuii bey? Khriig sha! Riig bo, ishak ne wuiiruii ro ‘Bran Dufuii shii ne layogthek bran pha blu pho wad shii phi muii phro.’ <sup>42</sup> Cho! Sieng srane dun ne, riig mage bo, hanyie gu shii khinrin pha bran ji ne ichiih um ro!”

### *Isu shii zum pha ji*

*(Mth 26:47-56; Lug 22:47-53; Jon 18:3-12)*

<sup>43</sup> Isu nyayao bamuii shii, boh Phabithek chiih-è Iphey yua pha masdothek nane dukhothek è thoh ge pha ibrogthek dog ne chiih-è muchang chiih-è khamriiethék yi ne wuii pha ithek rog shii samoy snanyi è jia Judas de wuii thog. <sup>44</sup> Judas è bran ibrogthek shii phriie jong phi phro: “Gu è bran



hanyie shii lab phi ne khichiug pha ji ne nathek chiid pha ji ro. Aishii zum srane chui zoi muui bo.”

<sup>45</sup> Achia dang pha Judas wuii thog ruii, Ai è Isu shii wuii srane yao “Masdo!” Chiih-è aishii khichiug. <sup>46</sup> Ji-è ithek ne aishii zum srane chuh kho muui phro. <sup>47</sup> Jishii thiichiih riu pho jia è ai khamriie khiasrid srane kho Phabi ro khiao pha khoh wiegthiak muui phro. <sup>48</sup> Chiihphado Isu è yao srane ithek shii yao, nathek ne gu shii mugohpho duine zum pha khamriiethek chiih-è muchiingbang rog shii wuii ne bey? <sup>49</sup> Gune idang ithek rog shii Hamangkhung-aphuii ro Misiahò hà yua shii, gu shii ne nathek è azum. Jishii hì ne jigigam zab re pha rek phro.

<sup>50</sup> Chiihphado ai samoythek ne aishii thoh marui srane yoh dun.

<sup>51</sup> Bran filiao jia ribiu guii srane ai idoh gieng srane ai rog lua shii, ithek è aishii de zum pha bidiang phro. <sup>52</sup> Jishii ai è yung thiichiih thoh marui srane ikhilen yoh dun.

*Isu ne limiang ibi shii noh thog*

*(Mth 26:57-68; Lug 22:54,55,63-71; Jon 18:13,14,19-24)*

<sup>53</sup> Chiihphado, Isu shii ne boh Phabi, thiig pha dukhothek chiih-è Iphey yua pha masdothek wuii khrab pha hò hà noh dun. <sup>54</sup> Phithar de ruang è lua srane, kho Phabi hò sibiang shii thog. Thi-ichiih shii ai de hò riig pha khiaothek rog shii bai ang ne awai shii lua rek ne rai. <sup>55</sup> Boh phabithek chiih-è zab limiangthek è Isu shii ua pha ichiig khagi sow shii, jishii ithek ne nyie de adoh mua

ro. <sup>56</sup> Khagi pho è de bajo Isu Chiang shii biidiie yao, jishii ithek miyao jine a-ò ro.

<sup>57</sup> Chiihphado de giak bran è jai srane Isu mak shii khlam ne yao phro, <sup>58</sup> “Gathek è ai è hì è yao pha yoi phro, gune bran murab pha Misiahò hì ne chuak muui srane da-uom pha idoh shii ne bran murab asi pha jia rung ruii phro.” <sup>59</sup> Jishii ithek miyao pha phaluii jine a-ò phi ro.

<sup>60</sup> Kho Phabi jia è aishii ithek zab pha moe shii riu iang yi srane Isu shii musai sai, “ItheK è na shii nin ne the pha ji ne, na shii ne muchang oi bey?”

<sup>61</sup> Jishii Isu è aro pha rai ne, chiih-è nyie jia de miyaogam ayao ro. Din ne Kho Phabi è aishii sai, “Na ne Hamangkhung-aphuii ro khirzey dufuii Masi ji bey?”

<sup>62</sup> Isu è chang, “Gune ji chak ro, nathek de doh ruii phro Bran Dufuii ne Bohblu Hamangkhung-aphuii ro phazoi shii dug ne, chiih-è Hamangkhung è sakhamiing rog shii wuii ruii phro!”

<sup>63</sup> Kho Phabi è ai ro yung ji srane yao, gathek ne dinne muna khagi achid sha phro yao! <sup>64</sup> Ai ne Hamangkhung-aphuii shii makhakriing pha miyao jine ithek de yoi phro, jiè ithek muphak ne nyie lei?

ItheK zab ne aishii mak rek phro, ai ne ichiig um ro jiè ai ne iy chid phro.

<sup>65</sup> Thiichiih pha giak bran è Isu shii chan cho mage, chiih-è ithek è aishii mieg pho srane zuang. Chiih-è ithek è yao, “Na shii hanyie muzuang lei

ne ìd riig bo!” Chiuh-è, ragia rek pho è aishii noh srane phey mage phro.

*Phithar è yao gune ai rog shii luapho asi ro  
(Mth 26:69-75; Lug 22:56-62; Jon 18:15-18,25-27)*

<sup>66</sup> Kho Phabi ro khiaomuii ji wuii thog shii Phithar yi bsa hò sbiang shii nyarai ba muui ro.

<sup>67</sup> Ai è Phithar yi bai ang ne rai iang pha doh shii, ai Phithar shii miang riig srane yao, Na de Nazareth pha Isu rog pha bran bidey ne.

<sup>68</sup> Jishii Phithar è aishii yao “Hi pha miyao ne izai asi ro, gune aishii athieg ro, ai è chang, na è nyie yao ramuii pha ji ne gune agao mua ro,” chiuh-è ai sbiang pha muthua è fuang nyakhia dang shii, khephuii è ìo mage.

<sup>69</sup> Jipha khiaomuii ji è aishii thiichiuh doh srane riu pho shii jao ne yao din, “Ai de ithek è ne jia ro!”

<sup>70</sup> Jishii Phithar è dinne hi ne izai asi rone yao.

Ìujia pha idoh shii ai è Phithar shii ai moe riu ne rai pha ji è dinne Phithar shii de, “Na ne ithek rog pha bran asi rone biidiie ayao mua phro, nyieliieshii na de, Galili pha bran ro.”

<sup>71</sup> Chiuhphado Phithar è yao, “Gu surua thak ne izai yao phro! Gu miyao ji izai asi arone Hamangkhung-aphuii ne gu shii ne lago phi phro! Chiuh-è na è yao muui pha bran chiang shii gu athieg ro!”

<sup>72</sup> Chiuhphado dang shii khephuii è nyichiieng ìo mage phro, chiuh-è Phithar ne Isu è aishii yao khe nyichiieng ìo pha ibi shii na è gu shii uomchiieng khlam ne a-ìd rone yao phrone aishii yao pha ji

nowkhlei mage ne, chiih-è ai ne azud mua pha cho dun phro.

## 15

*Philathus moe shii Isu noh thog*

*(Mth 27:1,2,11-14; Lug 23:1-5; Jon 18:28-38)*

<sup>1</sup> Hamiang riang shii boh Phabithek è thiig pha dukhothek chiih-è Iphey yua pha masdothek chiih-è zab limiangthek ne khthiie si srane phak rai. Ithek è Isu shii shiirnai è zoi srane Philathus moe hà noh ne, ai wad shii phi muui phro. <sup>2</sup> Philathus è Isu shii sai, “Na ne Jewthek pha saja bey?”

Isu è aishii chang, “Na è nyie yao pha ji ne, ji chak ro.”

<sup>3</sup> Jipha boh phabithek ne Isu shii bajo ichua yao ne nin dun. <sup>4</sup> Ji-è, Philathus ne aishii sai din, “Na ne chang pha nyie oi bey? Nuii bo, branthek è na shii awie pha nin pha ji ne ayoi bey?”

<sup>5</sup> Ji è yao magunde, Isu ne miyaogam jia de ayao phi, ji è Philathus de wiengphleg dun ro.

*Isu shii ua yi pha yaothiak*

*(Mth 27:15-26; Lug 23:13-25; Jon 18:39—19:16)*

<sup>6</sup> Idang Hiidun pha ji Sai pha itho shii ne Philathus è phatheg shii chab pha hanyie shii magunde bran jia shii branthek è lia pha ji thoh muui phro. <sup>7</sup> Jipha ishak shii Barabas beng pha bran jia yi phatheg hà chab muui phro, nyieliieshii ai è giak thek gak pha ji shii, gui ne bran ua muui pha Chiang è phatheg hà chab muui phro. <sup>8</sup> Bran ibrog è Philathus shii khrab thog ne idang rek pha duiine phathegpho jia shii thoh bo è yao,

<sup>9</sup> Philathus è ithek shii sai, “Gu shii nathek ne Jewthek pha saja shii se ne thoh bo ne yang bey?”

<sup>10</sup> Philathus ne thieg muii, boh phabithek è Isu shii miegriie ne zum srane ai wad shii phi muii phro.

<sup>11</sup> Jishii boh phabithek è ibrogthek shii nyiu ne yao srane Isu Chiang shii, Barabas shii ichad thoh phi bo è Philath shii yao ba yi phro. <sup>12</sup> Philathus è ibrog shii sai, chiihphado gune nathek è Jewthek pha saja rone ho pha bran shii ne nyie rek bo è now lei?

<sup>13</sup> Ithek è idoh ziak, “Aishii ne bai shii zun muii bo!”

<sup>14</sup> Philathus è sai, “Jishii ai ne nyie ichiig rek phlei?” Ithek ne dinne de gang ziak, “Aishii ne bai shii zun muii bo!”

<sup>15</sup> Philathus è bran ibrogthek wie than yi pha Barabas shii ithek Chiang è thaluu thoh mage phro. Chiihphado ai è Roman siphahithek shii phi ne Isu shii chia yi srane chiih-è bai hà zun ne ua yi pha phi muii phro.

*Siphahi è Isu shii makhakriing  
(Mth 27:27-31; Jon 19:2-3)*

<sup>16</sup> Siphahithek è Isu shii badri ro ithua pha muthua iliing hà noh srane, gai ijakthek shii de ò ho phro. <sup>17</sup> Ithek è Isu shii yung phiang ishaig guii phi srane migem è rab pha rago ai khrug shii khak phi phro. <sup>18</sup> Ithek è wad khung ne aishii yao, “Jewthek pha saja phiang sieng bo!”

<sup>19</sup> Ithek è ai khrug shii muchang è thab srane, chiih-è ithek è aishii chan è cho phro, chiih-è, ithek lagiung niing srane aishii chiing phro.

<sup>20</sup> Ithek è aishii makhakriing ched mage shii, ithek

è yung phiang than srane awairo yung idoh guii phi phro. Chiihphado ithek è aishii bai hà zun ne ua pha noh dun phro.

*Isu bai shii zun muii*

*(Mth 27:32-44; Lug 23:26-43; Jon 19:17-27)*

<sup>21</sup> Lumuii hà ithek è Simon beng pha bran shii si, ai yi soh è rajan hà wuiiramuii shii, siphahithek è aishii de Isu ro bai nuang pha bangchiie rek phro. (Simon ne Syrene pha bran ro, chiih-è ai ne Alezandar chiih-è Rufus ro Aphuii ro). <sup>22</sup> ItheK è Isu shii Golgotha beng pha ithua hà noh dun phro, hì pha miyao ne gadong ithua rone yao phro. <sup>23</sup> Thiisa hà ithek è Isu shii riie pha ji them yi pha angurphuii shii myrrh lao ne phi pha bidiang shii, jishii Isu è niing pha anuii phi ro. <sup>24</sup> Chiihphado ithek è Isu shii sharo rek ne phey srane zun muii phro, chiih-è airo yung yi awaithek chung thang rai phro, chiih-è airo yung idum ji ne hanyie muii lei ne miiran riig ro. <sup>25</sup> Hamiang ishak dige shii, ithek è Isu shii zun muii phro. <sup>26</sup> Ai khrug lakhung shii hì the pha miyao ji zey phro: “Jewthek pha saja ro.” <sup>27</sup> ItheK è mugopho nyi shii de Isu rog shii zun muii phro, jia shii Isu phawig hà, chiih-è jia shii Isu phazoi hà. <sup>28</sup> Jigigam shii nyie yao pha ji ne hì re dun phro, Branthek è Iphey anuii pho mirek shii rek pha duiine aishii de rek phro.

<sup>29</sup> Lumuii shii lua ramuii pha branthek è khrug sid srane Isu shii gang è makhakriing phro: “Ua! Na ne Hamangkhung-aphuii ro Misiahò shii

chuak srane da-uom shii rung din phi pha rek bidey ne! <sup>30</sup> Thuh shii thazam wuii srane nawai shii bai è ragia rek bo!”

<sup>31</sup> Ji duiine, boh Phabithek chiih-è Iphey yua pha masdothek de Isu shii makhakriing srane awaithek chung yao rai, “Ai ne gai thek shii ne ragia rek phi, jishii ai ne awaishii ragia arek-mua ara! <sup>32</sup> Cho Masi shii riig srane, Israel pha saja ne, thuh shii bai è thazam wuii mage arone, chiih-è gathek de aishii migi rek pha ro!”

Chiih-è bran nyi hanyie shii yi Isu rog shii zun muii pha bran è de aishii makhakriing phro.

### *Isu iy pha*

*(Mth 27:45-56; Lug 23:44-49; Jon 19:28-30)*

<sup>33</sup> Hanai duchoi shii zab pha soh ne igiia è chiieg dun phro, ji pha igiia ne ishak uom re dang dun phro. <sup>34</sup> Ishak uom shii Isu è gang è ziak mage phro, “*Eloi, Eloi, lama sabakhthani?*” Hì pha miyao siu ne, “Hamangkhung-aphuii, Hamangkhung-aphuii, nane gu shii nyie rek ne ji thoh muiii phlei?”

<sup>35</sup> Thiichiih um pha giak branthek è ai miyao ji sang ayoi pha nuii srane chiih-è yao, “Yoi bo, ai ne Elija shii ho ramuii ro!” <sup>36</sup> Thiichiih um pha bran jia è ijuang shii rui duiine rek pha yung è jiang pha muchang phiang rog shii ran srane, phuii chieng shii wo srane Isu ro sem shii wang ne yao, “Khan rai! Elija è wuii srane aishii bai è thazam noh phi pha de um phro, cho riig haro!”

<sup>37</sup> Gang è ziak srane Isu iy dun phro.

<sup>38</sup> Hamangkhung-aphuii ro Misiahò shii zun ne ruii pha yung de ijuang è yie ne ikhiing thog pha ji dun ro. <sup>39</sup> Arming dumuiithek thiichiih shii hanyie bai ibi shii riu pho ne Isu nyie khi-èrek ne iy dun pha ji doh phro. “Hì pha bran ne izai Hamangkhung-aphuii ro Dufuii chak ro!” Ai è yao.

<sup>40</sup> Giak hò-amuiithek thiisa ùjia ruang è riig ne rai phro. Ithek ne Mery Magdalene, ikhuii Jems chiih-è Joseph, ro amuii Mery chiih-è salomethek ro. <sup>41</sup> Ithek ne Isu Galili hà ba shii ai rog luagieng ne nong phi pha branthek ro. Jerusalem è Isu rog shii wuii gieng pha gai hò-amuii de thiichiih shii bajo um phro.

*Isu shii wieng muii*

*(Mth 27:57-61; Lug 23:50-56; Jon 19:38-42)*

<sup>42-43</sup> Habjuang re mage shii, Joseph Arimathea wuii thog ruii phro. Ai ne limiangthek shii de ilab um pha bran ro. Chiih-è, Hamangkhung-aphuii ro Sajathua ji thog ruii phrone khan ne rai pha bran ji ro. Hì pha inai ne (Jew Thung pha Inai saro pha ibi shii ro), jiè Joseph arum pha Philathus shii wuii srane Isu siu ji lia phro. <sup>44</sup> Philathus è Isu iy jong dun pha mua yoi mage ne wieng dun phro. Ai è awai arming dumuii shii ho ne sai, “Isu iy pha ji ne ishak phiang re sha bey?” <sup>45</sup> Dumuiithek è yao pha idoh, Philathus è Joseph shii yao Isu ro siu ji nya yi dun bo. <sup>46</sup> Joseph è jiang yung phieg srane, siu shii thazam yi ne yung è jiang srane sak è chog pha wieng rab pha ji shii yi ne ruii muii phro. Chiihphado wieng cho shii bajo lubao boh thud



ne kheb marui phro. <sup>47</sup> Chiih-è Mery Magdalene chiih-è Joseph ro amuii Mery de Isu siu-iy ji khi hà wieng lei ne sow ne riig wuii phro.

## 16

### *Isu hòi din*

*(Mth 28:1-8; Lug 24:1-12; Jon 20:1-10)*

<sup>1</sup> Jew Thung pha Inai jong pha idoh shii, Mery Magdalene, Jems pha amuii Mery, Salome ithek è Isu ro siu shii shun pha thiiliie phieg srane Isu siu-iy shii shun pha wuii dun. <sup>2</sup> Deobari pha hamiang riang hasiang siang mage shii ithek ne wieng hà wuii dun. <sup>3-4</sup> Lumuii hà lua ramuii shii, ithek ne awaithek chung yao rai, wieng kheb pha lubao ji ne hanyie è hong phi pha lei? (Hì ne bajo boh pha lubao ro.) Ji iyao ne wuii thog mage shii, ithek è riig shii ji pha lubao ne idoh thud ne um iang pha doh. <sup>5</sup> Ji-è ithek ne wieng bucho hà wuii dun, bucho hà wuii thog mage shii, ithek è filiao bran jia ne yung phiang imo guii srane phazoi hà dug ne rai pha doh phro. Ji doh mage shii ithek ne wiengphleg dun phro.

<sup>6</sup> Jipha bran è yao, “Awiengphleg chid rabo, gu ne thieg, nathek ne Nazareth pha Isu bai shii zun ne ua mua pha ji sow wuii phro. Ai ne ichiih shii oi ro, ai ne chai shii hòijong dun ro, riig bo, ai ruii pha ithua shii nyie de oi ro. <sup>7</sup> Ji-è nathek ne dun srane Isu ro samoythek chiih-è Phithar shii mua yao mage bo: Isu ne nathek ibi shii Galili hà thog phro, ai è khi-èrek ne yao marui pha ji duiine thiisa hà ithek ne aishii si.”

<sup>8</sup> Ithek ne zab sham ne rum chiih-è rumdun ne dun dun, chiih-è ithek ne rum ne ji pha miyaothek hanyie shii de ayao mua pha rai dun.

*IDOHHÈ PHA IHÈG MUAWIE \**

*Isu è Mery Magdalene shii si  
(Mth 28:9-10; Jon 20:11-18)*

[ <sup>9</sup> Isu chai hòi din pha idoh Deubari hamiang shii Mery Magdalene shii igobi dong, hanyie shii Isu è ibuii ragung miley khia phi pha Mery Magdalene shii si pha wuii ruii phro. <sup>10</sup> Mery Magdalene è Isu ro ijakthek zo ne choh ne rai pho moe shii wuii srane yao. <sup>11</sup> Ai è ithek shii yao Isu ne isieng ro chiih-è gune doh ro, jishii ithek ne ai miyao jishii migi arek ro.

*Isu ne samoy nyi shii dong  
(Lug 24:13-35)*

<sup>12</sup> Jipha idoh, awai samoy nyi soh pha ithua lumuii è lua ramuii shii Isu ne gai mia ne isa shii dong ruii phro. <sup>13</sup> Ji-è isa ne thadoh dun thog ne, Isu ro gai samoythek shii yao, jishii ithek è isa shii migi arek ro.

*Isu ne samoy snajia shii dong  
(Mth 28:16-20; Lug 24:36-49; Jon 20:19-23; Blk 1:6-8)*

<sup>14</sup> Ji-è rek ched pha idoh shii, Isu ne awai samoy snajia yi michie chie ramuii shii dong thog ruii phro. Isu è ji pha samoythek shii giung, nyieliieshii nathek ne aishii isieng dohjong pha branthek miyao ji ne lawasdai è migi arek ro. <sup>15</sup>

---

\* **16:8** 16:8: Giak jigi shii nane buyo zey pha ji muawie yi iidohhè (9-20) oi ro. **16:15** 16:15: Blk 1:8

Isu è ithek shii yao, zab pha sohjambling hà wuii mage srane zab brantheek shii gu Muawie hì yao mage bo. <sup>16</sup> Hanyie è migi now ne gu beng è khowo yi pho ne lago è ragia re ruii phro; chiih-è, hanyie thek è migi arek pho ne layog the ruii phro. <sup>17</sup> Gu shii migi now pho ne gu beng è buangtheek de rek mua phro; chiih-è, gu beng è awie pha ibuii ragung shii de khia mua phi phro; chiih-è, ithek ne nyuak iwo yao ruii phro; <sup>18</sup> chiih-è, pham chong magunde, miiriin chie na de, ithek ne nyie de achun phi phro; chiih-è ithek wad ne radshopho shii khoh ne sia phi magunde gang ruii phro.

*Isu shii Hamangkhung hà noh dun  
(Lug 24:50-53; Blk 1:9-11)*

<sup>19</sup> Chiihphado Ithong Isu è ithek shii yao ched ne aishii ne Hamangkhung hà noh dun phro. Thiisa hà Hamangkhung-aphuii phazoi moe shii dug dun phro. <sup>20</sup> Ji-è samoytheek ne zab pha ithua hà wuii srane Mua Wie ji yua ne lua, ji-è, Ithong è ithek rog shii rek gieng phro. Ji-è Mua Wie chiih-è buangtheek rek pha ji ne izai chak rone khagi re dun ro.]

*GAI IHÈG IDOHHÈ†*

[{9} Hò-amuii ne Phithar nane airo ijak shii wuii dun chiih-è ithek è nyie yao pha sasab ji yi dum jia yao. {10} Jipha idoh shii, Isu awai è awairo samoytheek shii bichiu è nugo thogdang pha wuii yi srane idang rai mua pha giawo ji shiiyi yi.]

---

**16:19** 16:19: Blk 1:9-11 † **16:20** 16:20: Giak jigi shii nane buyo zey pha ji shii idum iidohhè muawie um ro ji ne (itho 9-20) ji shii ne phiang iidohhè chodo ro

**Iwo Surua Mua Wie Pha Bible**  
**The Holy Bible in the Bugun language of India, first**  
**Bible translation**

copyright © 2023 The Word for the World International

Language: Kho (Bugun)

Contributor: The Word for the World Southeast Asia

The New Testament in Bugun  
published as

**IWO SURUA**  
**Mua Wie Pha Bible**

The Word For The World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-31

---

PDF generated using Haiola and XeLaTeX on 21 Feb 2024 from source files dated 31 Aug 2023

02eb8fa0-132d-5640-b9e8-5b17ef13756c